



832320

序

漆娥臺圯慘落日以無光慈母磯崩咽寒溝而有限樹從

堂北護已先凋循向陔南蘭空欲采何慙列女繪圖象於

屏風端賴文人脈徽音於簡冊此同邑潘博士鍾瑞奉思

錄之所由輯也博士與雲生同梓里跡竝苔岑詞華則左

錦張珠學問則董帷戴席詩人粟里詞客艸窗面未識夫

李邕首先低於謝朓迨同治歲丙寅廩臺跡掃鶴市烽清

還鄉而舊雨懷思道故則晨星寥落博士乃東陽過訪郭

泰來尋氣結芝蘭盟聯蘿薜與長輿對如仰千尺之松聽

彥先談宛奏八音之瑟抑且陳太邱惟敦行誼元德秀不

香齋精舍集

序

一

慕時榮飫其性情渾金璞玉挹其襟抱霽月光風爭欽此
日丰儀咸稱隱鵠誰識當年教養賴有慈烏母蔣太孺人
柔儀玉潤淑質珠輝堪作女師無煩姆教擅馬倫之才辯
精龍輔之女工偷餘閒於鴛繡膝下承歡先早起於雞鳴
房前問寢朱妙淨曲承母意嬰兒子長伴親身斯真閨闈
內之曾參巾幗中之閔子矣當夫委禽采納反馬禮成簿
註氤氳丸量歡喜爲接脚夫人得坦腹佳婿入廚洗手早
諳三日之羹對鏡修容祇服七升之布奉尊章於闔內曲
唱姑恩和築俎於閨中身全婦道半脣鼠耳其刀尺以經
營女布男錢偕米鹽而籌畫縱復五時衣單三隅熅冷入

黔婁之室知有賢妻來荀粲之家其稱令婦方冀雙宿同
生之木永眠不灰之牀而豈料伯牛有疾衛虎抱疴形壞
五倉技窮三折鳳樓月冷斷五夜之瓊簫鵬舍風淒動三
更之總帳中鞞旣卸膏沐遂辭截髻含哀摩笄抱恨生無
同室痛至壞牆調薑橘以祭夫姑茶蓼以見節長懷皇辟
欲相見於黃泉冀報賢雄乃得償夫素志方當賢婦之酸
辛幸獲威姑以勸諭爲言汝夫已歿吾老堪憐孰恤龍鍾
爲扶鳩杖庾沙彌之甘蔗此日無俱陳叔達之葡萄他時
誰獻矧夫盧家少婦已抱阿侯陶氏清門早生通子賈金
環於樹下跬步關心弄繡祿於牀頭昕宵哺乳若節高九
烈但知灰殉夫君而境歷千辛不克健持門戶將何以上
慰白頭之老下撫黃口之孤乎遂乃香爇更生藥栽獨活
藉婆心之苦勸且弱體以苟延送灰養生苦守者臆單鷓
寡仰事俯育難拋者鮐背鵲雛至是而爲婦彌賢事姑益
孝厠膾爽器手自安排和服中單身親澣濯庭前叱狗不
同鮑永之妻堂上供魚絕類姜詩之婦每當風鳴敗壁雪
灑寒窗鐙影幢幢冷照愁人之狀機聲軋軋恨抽寡女之
絲別自驚心蚤催宵而不嬾遑辭皸手烏唬曙而未眠甘
旨并營勤勞奚恤又復恩深鬻子曲奏將雛或尙童牙或
猶總角帳中銀鹿夜夜弄兒食肉丸熊朝朝助學俟諸狐

克承堂構庶九原可慰藁砧無奈姑偏善病婦不解憂徧
求龍府之方思采鵲山之藥分痛則甘爲灼艾延醫則苦
覓長桑問安否於枕畔每先家人進湯餌於房中不煩婢
媪七旬束帶侍寢忘疲一月焚香祈神如在由是飯依白
法厭棄紅塵身悟芭蕉性同薔蔔勤合掌於蓮座象禮鴿
王頻漱齒以楊枝經緡鹿女黃齋盛饗聊藉充腸紫莧堆
盤奚求適口何乃家門多故脂牽言旋夢斷璇閨省慈親
而已去塵埋鏡檻令息女以增哀迫衰頽之疾憂竟亡身
憶敬戒之箴言猶在耳加以一慟終朝同生長逝更傷手
足屢碎肝腸朝露歌淒哭阿兄而渺渺大雷書斷牘小妹

香禪精舍集

序

三

以熒熒頻感槿凋彌形蕉萃已况復獻履無勞慈姑見背
憑棺以慟孝婦酸心力疾以備衣衾強起而視舍歛委頓
依牀之側泣不成聲支離粟主之有毀將滅性七日之水
漿不入三年之衰經難終斷盡猿啼滴殘鴿血已枯之艸
霜蕭頻加將朽之枝風威曷敵竟侍夫姑於地下遂拋井
臼於大闕紡飄冷而風悲鍼樓閉而月慘時博士痛遭大
故尙在弱齡已能嚙指銜蔡順之哀輟社動王修之哭而
今則雲空親舍雨黯慈闈萊衣挂而已閒茅饌俱而誰食
能不念手中之綫感樹上之風哉或謂太孺人未臻中壽
遽赴仙游苟天假以年得身留乎世莫摧慈竹長茂貞松

在博士天性過人至情在抱束暫則庭闈時念伯仁則訓
誨克遵何難房集王峰林來阮鹿守丹柰以奉親歌白華
以將母能通遠道投杜孝之筒善事高堂負仲由之米無
如秋霜已履愛日難長占爻是三索艮男取象失六陰坤
母孝養未申親年不待矣又或謂博士倚馬捷才雕龍妙
手聲宣郭亮則俱協宮商筆落王筠班中出語金華殿上則雖不
踈遠駕鵬翅高翔廁身玉筍班中出語金華殿上則雖不
及版輿之奉錦被之頒同上殿於馮親效從官於荀母亦
得位尊承叔榮表瀧岡之阡官貴日碑爭畫甘泉之象無
如伏悲慙驥困若斂鸞徒別兩足於卞和莫出一頭於蘇

香禪精舍集

序

四

軾顯揚未遂人子盡傷矣然而數之修短天難違也命之
窮通人難強也但觀其丁年怨慕子舍低徊望已斷夫倚
門歌末忘乎陟屺嘉賓偶至輒懷截髮之晨游子常悲動
念製衣之日食菜羹於秦族爲卻肥甘奉木像於丁蘭如
親色笑故數可以靳親之年天不得以奪子之志也今者
雖居清秩不戀浮名品望重於士林聲譽馳乎藝苑顏清
臣之博學賴奉母儀陶士行之潔身夙推慈訓垂賢明之
則堪設乎絳紗揚仁孝之風早流乎彤管故命有以厄子
之境人究無以掩親之名也然猶慮坤儀之不顯母德之
就湮述此苦衷綜其懿行謹陳於吏爲上諸 朝荷

鳳綉於雲霄降

鸞章於泉壤名書青史異時待表夫閨幃輝耀烏頭今日
已榮夫綽楔更有儒林丈人詞壇健將應劉文士顏謝詩
家共裁翡翠之牋各試琉璃之筆表宣文懿德累牘鴻詞
彰洵母芳型聯篇鳳藻遂令陰律愈宣雌風遠布傳賢聲
於吳下與太湖之水俱長高淑德於女中偕鄧尉之山竝
峻得憑眾著益顯千秋爲之裝來細帙儲以縹囊寶若秦
珠珍如趙璧無何而夫差宮畔霧暗蚩尤胥相城邊星明
熒惑符朗則流離避地少陵則漂泊無家問長物其何存
并殘書而盡佚况此零星詞翰瑣碎篇章未免論語炊於

香禪精舍集

序

五

竈中資添薪火將士拾於帳下裂補戰袍而今則藏殊安
世篋未曾亾寶類中郎枕還留祕呵護定煩神鬼竟脫劫
壺孝思堪格穹蒼俾留幸艸附以所徵歸延陵姊灰事詩
文夫填海冤禽沉湘恨竹知仗義於憲英竟捐軀於嫫姊
空傷李勤莫焚煮粥之鬚遠痛女嬰忍見擣衣之石合成
一冊奄有眾長猥以微才敢爲隍引不爲魏收藏拙反當
元晏乞言嗟乎娥月光沉嫫星采匿未及拜伯符之母莫
仰令儀幸得交管仲爲朋始聞淑行慚無鴻筆奉揚四德
之休留得豹皮還望諸君之作從此凝千年之墨氣盡化
慈雲行且傾三峽之詞源都成孝水

光緒四年歲次戊寅季夏之月同里秦雲膚雨拜序

香禪精舍集

序

六



光緒四年歲次戊寅季夏之月同里秦雲膚雨拜序

序

蒙聞雅歌馨潔必寄情於蘭陔禮檢酒漿尤備詳夫棗贊
誠以大順之行不越婉愉內則之篇專紀婉嬾故坤母含
德體柔而彌貞與女有儀性順者益粹古之芼饋階阼笄
總寢門佩纁紉鍼致諼駮瘵篝燈擁帚不炫僮祁料姑性
於釜羹攝子舍之鑪箒茂勿雅頌焯管揚播女箴而一例
以潘孝婦之行殆猶未焉孝婦罹清儻之遇積纖孱之軀
鸞鑑辭雙燕幕棲隻竈下舊婢甯其孤窹牀前遺息只解
嗁號積無可賣之珠匳有曾質之瑱論其心則茹蘗未苦
方其境則集蓼倍辛而能使盤中之滌隨常存帷內之嗜
香禪精舍集

序

一

欲無忤陶婦截髮先謀旨甘衛女病心自擯藥石徵諸婦
德難乎不難且夫柏舟孤汎特矢髣髴桐軫觸鳴致椎充
耳貞矣而未慰黃壤之孝思翦香銘骨職竟晨奠匿七鑽
頸跡躡幽城烈矣而遑顧白頭之孤慘孝婦則哭夫空谷
遠移胡曠之唯聲獻頌慈筵且學臻妻之怡色以巾幗而
承萊綵易茶苦而薦葶甘機杼糝霜孤唳應雁刀尺量日
十指爲龜遂使瓊玉之華屢磨而損蒲柳之質未秋先凋
愁煎劉妹之腸勞瘦班姑之肺婦因致病姑忽沉疴猶欲
親料液湯私億含飯必誠必信斯踊斯號新建婦忍灰事
親不留餘力淮陽女代夫終養竟瘁厥躬偉哉孝婦無聞

然矣今其哲嗣磨生博士德述孟機恩感歐荻例高家之
造象同此烏私比永叔之表阡廣徵鴻製一時修文之史
珥筆上聞立說之儒辦香實錄屬辭堅確絕擯彙言選句
清真非同諛慕觥觥成集卓卓可傳鼎也識囿蛙眶音渺
蚊喙仰霜松之苦節

鼎曾祖母馮孺人
祖母董孺人

欽旌節孝生曾
憲獎匾額節比霜松

愧眇表章

觀椽筆之鉅文洪能牖闡一編哀襲他年首上輶軒四德
統綜此日足輝乘筴光緒四年十月同郡王廷鼎謹序

香禪精舍集

序

二

欽旌孝婦

覃恩賜贈孺人顯妣蔣太孺人孝行述略

嗚呼

鍾瑞

不幸生六月而孤入齡而吾母復歿歿後二十

三年從父太史公纂輯支譜伯兄與按討之役乃命

鍾瑞

詮次吾母孝行以備采擇焉吾母姓蔣氏考諱亭公諱錫

辰吳縣附監生妣氏唐以乾隆癸丑八月七日生年二十

三歸府君不逮事大父相府君以侍大母繆太宜人凡九

年生

不肖

輩三男一女而寡養姑撫孤者六年越外大母

歿之四月遭大母之變吾母痛母哭姑哀毀以終年三十

有八距大母之歿僅七十有五日蓋道光庚寅四月二十

香禪精舍集

卷二

一

三日也時

不肖

幼弱賴伯父廣文公教養至於成人迄今

饗祀愴然追念吾母之色笑恂恍不能復識矧生平懿行

又烏從記憶哉顧自稍長見戚黨尊行莫不嘖嘖道吾母

賢伯父亦時言之故耳熟焉不敢忘竊聞吾母少事外大

父母卽以孝聞于歸後善視大母先意承志一秉至性大

母喜謂府君曰吾年老且病常恐不能了向平願今汝已

婚新婦又能事吾吾無憂矣相府君主中饋不以瑣屑累

勤學癸未冬府君邁疾百計調治瘳而復劇至甲申正月

竟不起吾母仰天椎心誓不獨生大母止之曰若不念我

白頭姑乎且子女幼遠死何以慰爾夫乃含辛制淚兼任

事育自茲長齋奉佛迄於終身當是時家無宿儲凡滯澹之奉蘭茝之奠師塾質座之餼僕媪參養之需以至

不肖

輩衣食之資悉傾匱篋粥飯珥以供不足則鍼黻佐之或寒夜倚燈戰塚徧十指弗恤也大母常患頭眩心悸習靜惡喧吾母依大母臥樓恒中夜飲泣不出聲定省之際仍勉爲歡笑伊鬱積於中勞瘁歷於外體素弱始患肝疾乙酉忽發癩數月復病癩歷年不愈或勸服藥則曰姑多病吾不能奉葠苓小恙奚治爲或勸廢齋則又曰未亡人苟延殘喘一餐多矣奚恣口腹爲其刻苦如此然每夕必諮大母所嗜詰晨手調以進必問甘否曰甘乃安外大父

香禪精舍集

卷二述

二

歿於丁丑吾母旣哭之逾時言及輒流涕己丑冬外大母以舅氏竹安公病劇亦臥病吾母力疾歸奉湯藥依依如在家時外大母歿舅氏一慟而絕吾母佐治喪事一一如制而心痛高堂兼傷手足病根益固庚寅春漸成瘵疾二月初大母驟病吾母已委頓恨不能起數遣人審視形色以告身在牀蓐猶誦佛以祈速痊數日大母遽逝乃拊枕哀號曰吾忍死數年徒以有姑在耳今吾病而姑亡是終無以盡吾心也天乎何厄吾之甚乎旣又曰今而後可以見地下人矣乃強起視含斂人莫能阻病中自覺項折有聲至是扶掖而出首不克舉不能卒事而罷親族見者咸

歎惋而病益不可治矣猶日夕慟哭夢輒與大母處醒則以隨侍泉臺自祝雖醫禱雜施而病纏心骨竟患喉痺以終痛哉

不肖

猶憶伯父謨輓聯云母歿姑亡半年中泉路

追隨益信此生全孝道兒孤女幼六載來孀居鞠育何堪

一夕失慈暉蓋紀實也伯父又嘗諭

不肖

曰汝父歿時汝

母矢死甚堅非祖母幾不可奪祖母疾作婢媪鮮當意者

汝母仰體周至吾時或以公車北上或因巖業往浙妯娌

輩又居室相隔惟汝母樓居聞聲卽至首任其勞往往寒

不增衣暑不握扇夜不交睫晨不釄面歷久無怠色祖母

不亡當不至遽殆其生也爲姑其死也亦爲姑汝母可謂

香禪精舍集

卷二

三

孝婦矣小子成立尙其表章之

不肖

於吾母遺行旣不克

盡知知者又不能盡述記有之有善而弗知不明也知而

弗傳不仁也不明不仁之咎惟

不肖

爲甚敢弗勉就所聞

略敘什伯之一子女嫁娶詳支譜世系中不贅述伏冀當

代君子錫以傳志用垂家乘俾異日采風者據實請

旌不肖等世世感且不朽咸豐癸丑十二月不肖男鍾瑞

謹述

潘孝婦傳

男茂先鍾瑞謹錄

吳縣吳嘉淦清如

余讀元史至新建丁氏事而歎其難於殉夫也氏夫鄭伯文病亟氏與訣曰君有不諱妾當從但君父母已老無他子婦侍養妾苟復自亡則君亦不瞑目妾且忍死以奉其餘年伯文卒氏年二十七父母屢議嫁之氏慟哭曰妾所以不死者非苟生有他志也與良人約將以事舅姑耳今舅姑固無恙妾豈可棄去而不信於良人乎乃止史臣著諸列女傳豈不以其難有十倍於殉夫者乎近同里潘君鍾瑞持其先孺人孝行述乞爲傳垂諸家乘余閱其事與丁氏相類他日當與並傳乃爲志其略曰孺人姓蔣氏在家時事父母以孝聞年二十三歸貲贈修職郎潘君遵範事姑惟謹道光甲申正月夫歿孺人誓以身殉姑止之曰若不念我白頭人乎乃止自是長齋奉佛以終其身家貧無隔宿儲孺人傾匱資不足佐以鍼黹十指數欸弗恤也姑患心悸惡囂孺人與同卧起進食必問甘否如是者有年以勞瘁故得疾久不愈或勸服藥則曰姑病不能醫敢治吾病乎或勸廢齋則曰未亡人苟延殘喘奚恣口腹爲孺人父母先後卒哀慟不已遂成瘵疾庚寅二月姑病劇孺人委頓不能起猶數遣人審視數日姑歿孺人拊枕哀

號曰吾忍死數年以有姑在耳今吾病而姑亡是終無以盡吾心也既又曰今而後可以見地下人矣強起視含斂不能卒事而罷未幾遂卒年三十有八蓋距姑之歿七十五日云子三茂先守先鍾瑞長洲縣增貢生咸豐己未秋大吏以孝婦彙題請旌

香禪精舍集

卷二文

二

嘗觀於盧氏之冒刃衛姑而歎其克以孝稱者幸也夫遇賊而能以身衛姑孝矣然亦幸而賊無殺姑之志而吾姑可免耳假令賊之志必欲殺姑豈以一女子而能禦賊以全姑者如是而姑難免於死衛姑而姑終死則冒刃豈善全之術假令衛姑而適以攫賊之怒則賊必先殺婦而後殺姑死之後重泉相遇姑雖不怨婦以婦自思能無後悔設不然賊先殺婦旋有殺賊之人而姑得生姑生而婦死姑無婦則扶掖無人婦在地下心安乎哉吾故曰幸也惟於倉卒之間白刃在前不知有身只知有姑而卽以身衛姑無躊躇無避忌爲獨難耳然而激於一時之血性其事可一而不可再可暫而不可常者也吾乃觀於潘孝婦之本末而不能不加敬焉潘孝婦之孝其有歷久彌篤者乎在家時孝父母此孝之本於天者也出嫁後孝姑嫜此孝

之本於人者也夫孝一而已矣又何有天與人之異不知
父母以天合姑嫜以人合而惟純於孝者則無天人之分
而皆出於天性之至誠此豈盧氏所可同日語者而且歸
潘後九年而夫死則孝也而節兼焉家貧以鍼黹佐甘旨
孝不以貧而變也姑病而婦亦病孝不以病而懈也迨姑
死而病已殆而猶強起視含斂則姑生而孝姑死而孝所
謂有始有終者也夫孝婦之病以姑之病故而得固也顧
何以姑死七十五日後而婦亦死或曰此婦之夙願而今
得如願以償此孝婦之所以爲孝也而不知夫死之時願
與偕亡其所以不死者以有姑在耳今姑死而其心無所
繫戀則死且惡知非天以死遂其志而成其名以彰長齋
奉佛之報乎姑生而義不忍死姑死而義不獨生是生亦
孝死亦孝至死而亦孝則死真不媿矣然則潘孝婦之孝
非幸也有兩全而無獨全而又非斤斤求一時之孝者比
也與盧氏之衛姑孰難孰易必有能辨之者事聞
朝廷旌以異典宜也不足爲孝婦異也子祗增貢生其後
功名之顯與不顯俱未可知然潘氏之後必有興者

吳縣馮桂芬林一

孝婦蔣孺人蘇之吳縣人父錫辰附監生母唐年二十有
三歸於同縣贈修職郎潘君遵範年三十有二而寡越七

年卒孺人在室孝事父母比歸事姑繆宜人如事母宜人
愛之如女夫歿誓以身殉宜人曰若不念白頭姑乎子女
幼何以慰若夫乃涕泣從命自是長齋奉佛終其身家不
中人產以十指供甘旨暑汗寒戰瘡不休姑老病坐臥一
樓形影相依中夜飲泣不使姑知疾作不服藥曰姑病不
能奉養餌況我乎或曰斷齋疾且已孺人曰未亡人一餐
多矣奚敢恣口腹聞母病力疾歸則母與兄相繼卒越四
月姑又卒病中扶掖俠牀側汔不能成禮而病益殆曰而
今而後可以侍吾姑吾天子地下哀號支離七旬有五日
而歿年三十有八時道光十年四月二十三日也咸豐九
香禪精舍集 卷二 文

四

年大吏以行義聞

詔旌其門子三茂先守先鍾瑞守先殤鍾瑞長洲庠生有
文名女一適長洲庠生吳師曾

舊史氏曰先祖妣錢恭人苦節撫孤三十餘年以署年不
合例不與旌典今觀孺人行事孝而節者也而

旌孝不旌節則亦例爲之例以年三十以下爲中格而孺
人羸二例以守節十年爲中格而孺人又不及三夫例之
說誠出於不得不然顧天下瑰異絕特之行湮沒遺佚於
幾希之間者豈少也哉

孺人潘君諱遵範之婦曰蔣氏父諱錫辰妣氏唐年二十三歸於潘九年夫歿事姑撫孤六年母歿而姑殂孺人以哀毀病卒孺人在家孝於父母及爲潘婦以事母者事姑孺人之事母也蔣氏之人知之以告潘氏也及其事姑也則潘氏之族無不稱之故潘氏支譜中具詳孺人事當潘君歿時其姑已老孺人欲從夫死姑曰爾不念我白頭人乎孺人乃以姑言而不死姑之爲此言亦以見婦姑之不能一日相離也孺人事姑以勞瘁得疾或勸服藥則曰姑病不能醫敢言吾病乎或勸無長齋則曰未亡人願終身蔬食無以口腹爲也其撫孤也有三男一殤而鍾瑞有文

香禪精舍集

卷二文

五

名又能思親之善以聞於時孺人之於潘氏勞身苦思行已備矣人不能以盡書書其事母與姑者以表其孝書其子之才而有成者以著其爲母之賢書其居貧自力以見其貞順而守道嗚呼爲人婦而得盡爲人子之禮無不足矣昔之陳寡孝婦夫死而養姑不衰慈愛愈固君子以爲備於婦道吾於孺人亦云

贊曰不幸夫死專心養姑號曰孝婦以旌其閭比於陳寡之守節而功多於撫孤

蕭山湯紀尙伯述

自劉知幾譏范史傳蔡琰而後世史家遂專書節烈惟李

延壽北史仍魏隋舊題尚箸列女其南史則以蕭矯妻羊
等廁爲孝義夫范氏自敘明言錄其高秀不專一家而子
政紉爲列女傳首母儀次賢明次仁智次辨通乃臚列女
行固非專爲節烈設也蓋門內庸行婦道之常處之曲當
雖神聖爲之不能越其軌則然則表揚懿德固士君子維
世砥俗之具矣以余所聞吳中蔣孝婦者年二十三歸同
里潘君歸十一年而寡寡七年而卒年三十九大吏以聞
詔旌如例孝婦在室孝於親比歸潘推於事親者以事姑
意溢於色色溢於辭夫歿誓以身殉姑百方戒慰謂曰若
不戀白頭姑乎子女幼雛百年遙遙曷以慰若夫由是長

香禪精舍集

卷二文

六

齋禮佛以十指供絜養暑汗寒戰瘕不自弛姑老疾一樓
風雨形影相慰藉深宵憎憎背姑隱泣疾作不親藥餌或
戒以斷齋疾自己慨然曰未亡人以瞑目爲利征曷恣口
腹爲聞母疾遄歸母與兄相繼卒越四月姑又卒扶病哀
號挾牀側病日劇七十有五曰亦卒子鍾瑞長庠貢生賢
而多文將大厥族余友江山劉太守彥清當世鴻達篤雅
君子也屬爲傳迫人事久未報因質述以爲史家傳列女

者式焉

書潘孝婦傳後

男茂先鍾瑞謹錄

新城陳 驥曼禪

婦人之於夫義緣情起而貞於一不幸引脰絕臆以遂其
激烈之志世猶賢之至於所天遘閔親老在堂制情從義
以婦爲子使其夫已死而能事生者其親無子而如有子
焉者較之激烈於一時者又遠矣故論婦行者節易而孝
難國家旌褒之例表其節而必兼核其孝者其不以此也
歟吳縣孝婦蔣氏適同里潘遵範遵範死孝婦欲以身殉
爲姑老而止自是事姑十餘年姑病心悸孝婦與同臥起
家貧甘旨醫藥皆於十指取給以是得勞疾姑病孝婦病
香祖精舍集 卷二 文 七

亦劇姑死孝婦慟曰吾爲姑故忍死今姑死吾有以見亡
者矣未幾遂卒相距才七十五日耳然則姑在而孝婦不
死遵範固未嘗死也姑死亦死其從姑也與殉夫同嗟夫
孝婦所爲非有驚世駭俗之行然非明於大義亦烏能處
憂患之境自達其誠孝於數年之久而卒不改其志如是
而世俗所稱歎率以引脰絕臆爲婦行之奇是知其易而
不知其難此婦之孝者所以少歟若孝婦者可謂兼之而
爲其難者矣余讀吳君所爲孝婦傳發其義而詳書其後
以諭來者

同郡吳碩卿水部以吳清如先生所誤潘孝婦傳見示屬
書姓名於後星鑑於鄉賢中服膺二林居士蓋其闡揚貞
烈節孝足使百世下頑廉懦立有功世教不淺今觀孝婦
蔣孀人歸潘君遵範未久而寡寡而不卽死者以姑在迨
姑歿而遽哀痛死其志苦其行庸非尋常以一死從天地
下者傳擬之元新建丁氏當矣吳先生負鄉里重望四十
年文筆謹嚴出入歐陽視彭氏四貞女傳何多讓焉猶憶
去夏在樊道得南溪縣三貞女縣令唐炯作文以表揚之
往來七千里又得一孝婦且爲星鑑同郡人吳下爲禮教
之鄉孝子烈女節婦之載在志乘者未易悉數若孺人者
香禮精舍集 卷二 文
不尤可勵俗乎其得
旌也禮也

吳縣吳重熙蓮勇

孝爲百行之原有士大夫讀書數十年而不克一盡者何
論乎婦人女子夫女子之生不過曰無非無儀惟酒食是
議無父母貽糶而已觀於采蘋采蘋之詩言諸侯夫人大
夫妻能奉祭祀此外無聞焉雖內則一篇父母舅姑並稱
然古今所傳孝婦甚夥豈不以菽水之奉湯藥之侍舉凡
養生送死之事皆有夫在婦惟相夫有道無所表見歟今
讀蔣孝婦傳而有異焉當孝婦之哭夫也一慟幾絕乃以

姑言含辛制淚仰事俯育以慰夫未竟之志迨姑死而竟以毀卒是向之所以不死者徒以有姑在也夫妻道與臣道一也夫在猶君在也夫在妻不能自專至於夫死則託孤寄命之事皆於婦是賴當斯之時一死未足以塞責孝婦則生盡其養喪盡其哀以士大夫所難能者而出自婦人女子噫異已抑聞之爲善無不報積德有必昌先曾祖妣徐太恭人剝臂療姑錢竹汀宮詹爲作徐孝婦傳梁山舟學士顏其額曰孝同郎鄭迨從祖清如先生通籍追贈如例人咸謂孝婦之報榮陽素稱望族科第之盛甲於吾吳以孺人之苦節純孝後日子孫必有貴者隴岡之表吾香禪精合集

卷一文

九

將於鍾瑞徵之

吳縣亢樹滋鐵卿

欽旌孝婦蔣孺人吾友潘君麟生之母也麟生生六月而孤孺人以一身理家事而奉姑尤謹能得姑歡心家故貧恒以十指佐甘旨姑患心悸孺人與同臥起者數年備極勞悴遂得疾姑卒孺人拊枕哀號者七十有五日竟以毀卒麟生紀其事特詳且乞吳先生嘉淦馮先生桂芬爲之傳所以不朽孺人者有在又奚藉於余言願自先王之道衰而家庭父子之間有不忍言者矣况婦之於舅姑也但合之以義歸之以分無愆於禮節斯已耳安有不可解之

潘母蔣孺人孝行述略書後

吳縣石渠梅孫

同治丙寅之夏潘子鍾瑞奉其母夫人孝行述略乞言於
余余受而讀之深歎庸行之苦節而竊幸孝婦之有後
也余於癸亥春始與鍾瑞定交滬上既而先後歸鄉里誼
益密嘗詢鍾瑞君家有字蓮峯者繫何人則鍾瑞之尊甫
修職君也因瞿然起嗟歎不置記昔嘉慶己卯秋嘗結文
社於定光禪寺余年始十七落落寡交識蓮峯府君於儕
輩中一見如故每嘔就余及劉君視青三人常同案坐商
摧文義娓娓不倦君貌豐腴喜詼諧坦率無城府故人亦
香禪精舍集 卷二 十一

樂交君如是者半載餘後聞君早卒音問遂隔嗚呼孰知
四十年後以文字知交時相過從既愛其文章更重其品
學者乃蓮峯令子事而孝婦之恩勤鬻子培植其始基俾
得有造者不益可想見耶蓮峯有子可以不死若僕者徒
增長年之悲老至而無能爲也孝婦苦行諸君長言之詠
歎之矣余特以謬附交識於蓮峯府君者述於鍾瑞儻亦
孝子所樂聞而於先人之色笑愉悅而想其萬一乎

長洲蔣德馨心香

女如也從父母之教從夫之命故曰如姑故也言尊如故
也又稱曰戚漢律婦告威姑是也古來孝女殉父母烈女

殉夫事多流傳而夫歿養姑以終者陳孝婦外不少概見豈以姑尊且威有不如父母與夫之親者乎然坤德尚柔婦道承姑傳曰婦養姑者也婦旣以養姑爲義夫歿姑老則養姑之責愈重婦之與姑豈非相依爲命者哉昔鉅鹿魏溥卒妻房氏割左耳投棺中流血漉然仍曰鬼神有知相期泉壤姑劉氏輟哭謂之曰新婦何至於此范陽盧元禮卒妻李氏事姑惟謹及聞母崔卒於洛陽慟絕水漿不入口其姑慮其不濟親送奔喪至洛攀櫬號踊而卒之二人者皆有姑在房幸而不死李則哭母而竟死其於養姑之義何居孔子稱毀不滅性爲其廢養絕類也若我從姑

香禪精舍集

卷二

七

母之事姑始終不忍廢養其用心蓋良苦矣史曰父子之親夫婦之道天性也雖有禍患猶蒙死而存之誠愛結於心仁厚之至也詩曰母也天只女子出嫁移天事夫事舅姑如事父母孝婦在室卽以孝聞于歸後以事父母之道事姑則事夫如天可知夫其深明大義至性過人當我姑夫歿時椎心泣血誓不獨生豈不能如截耳割鼻者之烈及父母先後卒歸哭之慟哀傷成瘵疾又豈不能如李氏之攀櫬以從乃卒忍而不死直至姑歿乃曰今而後可以見地下人矣蓋前此徒以有姑在耳假使夫亡於姑歿之後則殉夫之志固無有能奪之者也又使父母卒於姑歿

之後病瘵不能起則更無所依戀者也惟其養姑之任綦重不敢息肩而又心痛逝者抑鬱之甚而志不得伸是以默然自悼有疾不服藥不輟齋雖萬苦纏心而百計承歡終不忍一日廢姑之養是則婦與姑相依爲命此義微特房李二氏所不能知而彼蒼者天不欲其爲杞婦荀女之流又不使其爲曹娥女勝之輩輾轉磨厲艱苦備嘗至養姑事畢而後得遂其志殆所以玉成其名也與夫婦人殉夫是爲烈婦女子殉父母是爲孝女而夫歿姑老忍死以奉姑之餘年則爲孝婦

詔旌如例有以也表弟潘鍾瑞以傳請題余謂姑母始終

香禪精舍集

卷二文

三

養姑所以爲孝爰本此意以書其後云

婁縣沈祥龍約齋

內則云婦事舅姑如事父母婦職之盡不盡視其事舅姑善否爲斷婦誠孝敬足佐子職之半然婦於舅姑以人合非若子於父母以天合故古者舅姑歿婦服期明其情殺於子也若不幸子歿令煢煢未亡人兼子婦於一身以事其毫且病之姑此人情所甚難而禮經之所未載蓋古人稱情立文不欲以至變之境至不易之事強人所不可能乃天性過人者往往動於誠而不以爲難嗚呼此潘孝婦之所以爲孝也與孝婦年三十有二而夫歿欲以身殉有

書族嫂蔣孺人傳後

夫弟遵祁順之

族嫂蔣孺人余同五世祖兄遵範室也年二十三歸於潘
逮事姑九年而寡又六年而姑卒孺人亦旋逝其在室也
固嘗以孝聞及爲婦益盡職兄早世孺人獨肩事育任家
已落姑又多病菽水之奉湯藥之侍倚十指佐之積勞瘁
遂亦邁疾恒自諱不使姑知逮姑歿強起哭踊不能支越
七十五日竟以毀卒卒後二十三年孤鍾瑞旣詮次行略
余爲采入家乘矣又廣徵翰墨之士爲表彰之詞更請余
文以志之余惟我八世祖玉溪公側室劉碩人以苦節昌
香禪精舍集

卷二文

五

其家自我六世祖其蔚公以下子姓繁盛皆所自出而鍾
瑞五世祖申亦以節行旌於

朝孺人之節格於年例不得旌而其孝尤人所難及其得
以孝婦請誠不以常格限之也嗚呼今之爲人婦者服紵
綺飶珍羞中饋之事弗問也甚或競妖冶習嬉遊內言之
出弗羞也其賢者尊嫜在前婢媪在後晨夕而定省焉歲
時而鞠履焉禮在則然耳疴癢弗親侍也澣濯弗分勞也
堂上有芘蔭之福室中無勃谿之聲嘖嘖然鄉里稱之戚
黨羨之以視孺人之所處何如哉孺人之侍姑也姑病作
必眩憊孺人臥起同一樓間聲卽至家人無先者寒不增

衣暑不握扇夜不交睫晨不噴面久之無倦容既以痰疾成瘵念貧不能奉養餌益自刻苦齋誦佛以祈姑年中閒痛母哭兒病愈劇及姑歿已臥不起拊枕哀號扶掖至中庭視含斂一慟幾絕項折不能舉未成禮而罷見者墮淚未幾遂卒嗚呼孺人之所處何如哉亦可以風天下之爲人婦者矣抑余聞之節孝之後子孫必昌鍾瑞其勉之其所以報孺人之苦志者宜有在也

又世以憐憫人之苦志者宜詳其也

其人使然矣則全聞之而善之對子新必且誠觀其感之
知未然也卒則無窮人必復其財而游亦不以風天下之
中頭撤舍燉一憫憐憫也此不謂舉夫知難而進其善也
其善也夫只誠食聞或故以子屬不以其財其財其財其
如積金資不謂奉養而益自謙苦故其善也其善也其善也
亦善不謂其善不文其善不謂其人其善也其善也其善也

紀潘孝婦事

茂先謹錄

平湖賈敦良芝房

長洲增貢生潘鍾瑞母蔣孺人在家以孝聞年二十三歸
馳贈修職郎潘君遵範善事其姑閱九年生三子一女而
夫亡孺人誓不獨生姑曰汝上不念白頭人下不念子女
乎乃止於是長齋奉佛以終其身家故貧傾匱資勤鍼黹
以佐之寒夜十指數彖勿恤姑常患頭眩心悸孺人相依
臥樓手進甘旨寒不增衣暑不握扇宵不交睫晨不頽面
如是者六年姑病歿孺人疾已委頓拊枕哀號曰吾忍死
數年徒以有姑在耳今而後可以見地下人矣乃強起視
香禪精舍集 卷二文 七

含斂病益甚越七十五日竟卒初孺人既痛父母俱亡孺
居養姑伊鬱勞瘁遂成瘵疾或勸之服藥則曰姑病不能
奉葠苓吾奚治爲或勸廢齋則曰未亡人苟延殘喘奚恣
口腹爲年僅三十有八道光庚寅四月二十三日也咸豐
丁巳冬大吏以孝婦彙題請

旌昔漢孝文時有陳孝婦者夫行戍不還養姑二十八年
姑八十餘壽終賣田宅以奉葬祭淮陽太守以聞使使者
賜黃金四十斤復之終身無所與號曰孝婦孺人之行殆
類乎是而又疾病不永其年視陳所遭尤足悲焉然陳無
子而孺人有子克家其志亦可慰己夫唐韓文公宋歐陽

文忠公皆少孤力學爲世大儒今鍾瑞好學能文章刻苦
勵行思顯揚其親吾知孺人之將有待於後也鍾瑞字磨
生與余爲文字交以孺人孝行述寄示徵題爰次其事而
書之

香禪精舍集

卷二 文

文

香禪精舍集卷二 文
文忠公皆少孤力學爲世大儒今鍾瑞好學能文章刻苦
勵行思顯揚其親吾知孺人之將有待於後也鍾瑞字磨
生與余爲文字交以孺人孝行述寄示徵題爰次其事而
書之

潘孝婦贊

男茂先鍾瑞謹錄

寶山蔣敦復純甫

嗚呼敦復不肖不能闡揚先母之節孝於心有隱痛焉其始蓋有待行年五十老大無成於是思以立言垂世願每及門內事握管手戰淚承睫不克成一字輒罷四方交遊有以表彰節孝詩若文來請者稽顙謝不敏夫惟吾之行誼無慚而後其言足以不朽而不肖何如乎咸豐八年夏四月客吳門幽蘭巷長洲潘君鍾瑞奉其母蔣太孺人之節孝行述踵門而請者再復免其友人極道所以見委之意誰非人子於此而更不一言不肖之罪滋重謹案吳先香禪精合集

卷二文

十九

生嘉淦所立傳而爲之贊曰

懿與孝婦實惟吾宗結璘誕秀瑤徽書彤于歸在室淑存不忒逮事威姑聿修婦職宛彼鴛鴦戢翼孔傷願殉夫子上辭北堂姑曰休矣余既喪子星星者髮汝忍余視矧茲藐孤呱泣諸雛析薪炊桂茹薺甘荼婦一日存夫一日不死死者復生生者不媿如何昊天姑疾沉緜制淚病榻弔影藥煙代夫侍母未亡何有母又歸泉請從夫後吁嗟蓼莪藐孤則那敬揚芳烈綽楔戔戔吳山岷嶺胥江清泚凡百女子俾厲此志

吳縣許廣颺虞臣

咸豐己未廬颺以太夫人之喪居憂山中友人蔣子介其
姑潘孝婦行狀來乞余言竊念終天之恨有生所同後死
之責顯親爲大有美弗彰百身莫贖乃一則桓發旌閭己
彰於身後一則王修哭社徒愴乎生前以此絜彼罪蓋滋
懇菊意異味夫復何言然循覽數四哀感彌禁有不能已
於言者焉夫國家歲旌懸有定例生人行誼判乎所遭使
其蓼莪早廢柏舟載賡則死爲地下之孟光生爲女中之
杵臼未嘗不義形於色節重如山而格限停年名隨沒世
卒之殯衢問母莫識生平登山望夫同悲一貉良不少也
且獨活不風而自搖葶藶當夏而旋萎使孝婦以積瘁之
身中道早喪則升堂之乳旣斷隔戶之棊誰彈仰事不終
至死猶憾安得以詞工幼婦漫等之上虞紛若史巫遂采
之中壘哉乃始則以婦代子而節兼乎孝繼則以死殉姑
而孝全其節百行旣完一字遂定良至性之自然亦處境
之所迫也迨乎令子扇芬母氏彰善史官采其實天語降
其門乃知九淵之下亦有天衢一岫之雲特煥昇采余實
不德不能貽親以令名爲可痛耳於孝婦何開焉贊曰
峩峩蔣侯爲吳之望誕生令媛乃家之光問年廿三言歸
滎陽有姑在堂蒼然頭白佩觿肅晨溫枕代夕母畢乃願
夫專爾刀胡天不弔雹碎霜彫邪衾半掩呵壁長號之虎

不變骨立形消母曰勿死以婦代子仰事俯育少慰暮齒
婦乃少忍含睫淚承喁喁漆室燄燄糠燈永誓有齋更炊
無米持緝縫衣賣珠進醴養姑撫孤危而獨扶姑終孤立
可告兒夫肩重欲息項強則折從姑地下殉夫同穴孝乎
惟孝節貞苦節持此風世曷貴明哲

吳元

和繆

宸觀紫

宸以薄植丁亂離轉徙海墉獲遇潘子鍾瑞越日奉其母

孝婦蔣孺人狀乞余言所謂繆太宜人鍾瑞之大母宸之
姑也案孺人在室卽以孝聞歸榮陽九年而寡事姑如事
厥父母越七年以毀死事聞得

香禪精舍集

卷一文

三

旌孝婦夫孝爲百行之原能孝則無不能又何間然宸居
世戚重以鍾瑞之請奚敢以不文辭謹爲贊曰

伊惟孝婦三徑風遺習禮嫻訓率性由儀于歸榮陽事姑
上堂姑視婦賢中饋克襄幃戒鳴雞庭肅叱狗習勤忘勞
寒暑歷九何圖豎厲我夫子禱顛罔靈妾惟一死姑曰
噫嘻余將就木爾殉而夫呱呱誰育婦聞蹶起如醉方蘇
含辛制淚宵旦事姑事姑七年實兼子職凜凜冰霜怡怡
容色何天不弔憂遘閔凶呻吟牀蓐哀毀厥躬強起視斂
一慟幾絕項折有聲淚流成血嗚呼孝婦視死如歸七旬
五日地下相依款冬經霜葶薶萎夏杵自無慚藁砧可謝

峩峩綽楔孝婦之里藹藹吉人孝婦之似

吳縣汪 芑燕庭

嗚呼孝婦特行其心之所安而已使呼天一慟誓死不顧於例得旌烈矣而非其心之所安也旣已茹痛視息變故迭遭古井無波三年一瞬於例得旌節矣亦非其心之所安也嗚呼孝婦特行其心之所安而已贊曰

緊嗟孝婦始也孝紆其烈卒也孝促其節一身兩世責三年寸心血北宮養兮境窶東海啼兮骨折明德必有達人兮豈惟矜式乎峩峩之綽楔

仁和朱康壽曼叔

香禪精舍集

卷二文

三

長洲潘明經鍾瑞母蔣太孺人旣以孝行旌於

朝明經復追狀遺徽累詞述德令善畢宣蓋太孺人爲孝婦爲節母爲潘氏再造之臣德至烈矣作者自中允馮公以下傳志銘誄人富厥詞壽不敏不獲以不文辭敬拜手而爲之贊曰

班昭作誡首崇婦職家國之慶肇始內則猗與潘母天秉淵塞式潔蘋蘩晨饗宵織春條早瘁綺歲不天藐姑方乳老姑華顛羹荼匪苦金鐵匪堅堂上白髮奉養深虔呱呱之子鞠以象賢於乎潘母肅昭相教婦供子職禦窮宜孝生厲其操沒彰其報

綸章賁錫子孫追悼載詠載歌百禩有耀於鑠維潘令聞
永劭

香禪精舍集

卷一 文

重

香禪精舍集卷一 文 重

潘孝婦誄

男

茂先謹錄

元和袁學淵文綺

孺人姓蔣氏秀毓名門習安儒素幼通班傳長奉張劄年
二十三于歸同縣贈修職郎潘君遵範祥占和鳳旦戒鳴
雞健稱持家孝敦循陔潔滌滄以順庭闈詠房敖而宜家
室伴下帷之攻苦志勛囊螢修舉案之莊容隱借挽鹿嘗
甕齋其有味薄奩粉而不施孰意鵬程未逞鸞鏡早分百
年之好促甚七霜重闈之親奉以子影撫麟兒以茹痛顧
鳳女而銜悲機窗秋蟀常和寒聲葦箔春蠶能描愁狀黃
蘖同其苦心青松比其貞操瓶空而炊玉維艱屋漏而牽
香禪精舍集

卷二文

一

蘿勤補指生皸瘃寒暑衣裳手捧槃匱晨昏菽水儲無隔
宿淚有千行六載承歡三春逢阨駭萱庭之降鵬泣柘館
之嗥鴟痛極七旬五日態失嫵妍命危一髮千鈞病成殯
殯竟於庚寅四月廿三日溘然辭世春秋三十有八曇花
影散範失女宗薤露歌終芳貽彤史魂消化玉之煙林傳
怨鶴夢斷望齊之路門咽涼蟬哲嗣鍾瑞余友也恐先德
之就湮懼幽光之終泯纂成行略求表芳徽溯彼拮据之
況不徒仰事俯育之勞揆其果決之忱宛有取義舍生之
烈吁可傷矣乃爲誄曰

懿彼淑媛作配滎陽德溫玉潤性潔蘭香虔羞蘋藻善事

潘孝婦詩

男茂先謹錄

盱眙吳棠仲宣

一編淒絕瀧岡表孝義千秋至性存古井波瀾澄月魄女
貞生死託金萱泉臺畢志仍隨侍病榻關心只報恩自是
從容成慷慨清芬嘖嘖重吳門

太倉張元培護航

悽愴囊砧化銜哀暈復蘇巧炊空手任扉戶隻身扶絕粒
懼傷孝續絲期撫孤一言真紀實生死為慈姑
樂安李誼託一昔耳賢聲備歷生人苦彌欽大節明遺經
傅子讀綽楔荷

香禪精舍集卷三詩

朝旌采錄資良史弋言貢寸誠

江甯楊長年樸斧

嗚呼姑一日在婦一日不敢死姑亡婦乃今可以見地下
之潘郎一解潘郎娶婦占曰嘉偶婦相夫子執箕與帚匪

惟箕帚抑念我母二解中堂有梓其文則理夫率其婦捧

盤捧匱屢我晨昏顧我色喜三解如是者九年如一朝夕

生三男一女夫子之側四解肆皇天不慈迺降禍無時夫

子竟已不起婦義與偕亡吾何以生為五解姑呼婦而告

曰肆皇天不慈迺降禍無時我子竟已不起汝義與偕亡

汝亡吾何以生為六解汝視汝兒呱呱汝視汝女嚶嚶汝

視汝姑白髮熒熒

七解

汝當代夫終畢我哀邁無令或怨

八解

姑言在耳婦收淚以起應曰唯唯

九解

寒風打窗

落日在墻兒歸于塾見母屏息於大母之旁搖手禁勿喧

有核貽汝嘗

十解

一燈倚壁十指皸偃影姑牀姑夢溫甘

管備酒漿陳歲朝過從男禪女裙親戚里黨有口咸津津

嗟發也實當門

十一解

一年復年兮日復日六載無殊夫在室

但勤寡女絲不鼓娥皇瑟恐姑聞知心滋戚

十二解

心滋戚

婦勞瘁疾婦疾莫瘳姑病彌留彌留之頃姑目長瞑婦起

視舍自折其頸喉痺遂成淚猶悲哽

十三解

嗚呼純孝死生

爲姑姑存與存姑歿與俱姑一日不歿婦一日有子之責

香禪精舍集

卷二詩

二

無所逃逋詎皇天之不弔焉靳壽于貞姝將千載式其庸

德永表墓與旌閭予感歎而述茲篇用告天下未亡人之

事夫

十四解

潛川吳 瑾中山

胥江之潮聲嗚咽吳門之烏夜淒絕中有孝婦秉貞誠十

數年閒心如結承歡最苦婦兼兒憔悴家門祇獨持姑死

一慟隨姑逝自此芳徽千古垂

崇明沈文第杏樓

粵稽列女傳貞孝節烈備從古賢婦人懿行皆足誌榮陽

母氏蔣秉心識大義在家以孝聞天性實真摯于歸修職

公勤襄中饋事夫賴善持家姑喜能承志夫學夙勤劬忽
邁二豎祟一病卒不瘳立誓赴死易賴有白頭姑婉言勸
回意從此奉佛虔茹蔬謝腥膩勉謀有無晨昏供酒食
卒歲勞針黹不時粥飲珥十指徧皸瘵一燈搖凍穗夜臥
泣無聲夙興間所嗜但愁姑失歡不敢自告瘁憂與勞交
并脾傷肝亦累或勸且謁醫奚取葠苓治或勸暫廢齋奚
取口腹恣惟求姑病痊我亦心願遂姑病逼衰年頭眩心
常悸屏息侍牀蓐殷勤奉藥餌竟忘疾在身寒暑不遑寐
母氏忽云殂兄復中道棄回顧嗟衰門拊膺橫涕泗逮及
歲庚寅春陽月躔二姑疾日重深婦身日顛賴沈綿委頓
香禪精舍集

卷三

三

中自恨不親侍數數遣人問形色教審視佛號宣萬千默
佑祈天賜遽聞姑西歸一慟悲難置夢去與姑見依舊臥
樓倚醒來與姑啖早祝死期至吁嗟卷施草俄隨萱蔭萎
泉路躡後塵一往志無異生死爲慈姑大孝斯不匱稱誦
在里黨題旌邀大吏垂裕後嗣昌璠璵生大器長君樂善
舉少子明經誼亮哉通德門稟承夙有自軌則式璇闈清
芬徧吳地海澨亦傳揚敬爲濡毫記

歸安管蘭滋谷香

冬嶺松不彫古井水不波自來節孝志乘多獨有榮陽母
氏蔣熒熒苦節經摧磨莫由事舅姑逮存別兼子職勤晨

昏上奉滄灑下鞠育纏綿病榻支清門茹荼六載志有俟
生死與姑相終始姑亡亦亡止兩月孝婦死孝事畢矣嗚
呼孝婦死孝事畢矣表章馨烈乃有子

元和韓崇履卿

貞松百尺高下有慈孝竹喬柯頽寒霜秋節彫殘綠夫死
婦有姑姑死婦誰屬有母先姑亡有身痛難贖高堂侍已
久泉路歸同躅生死隨姑歿此志堅如玉孝子念慈暉追
記耳所熟長齋一瓣虔夜線孤燈續遺徽渺難追涕淚不
忍讀蘋藻千秋馨寒樽薦芳醪

吳縣杜元勳春垞

香禪精舍集

卷三

詩

四

未嫁爲孝女旣嫁爲孝婦孝女之孝世罕有孝婦之孝更
無耦卓哉潘孺人孝母孝姑兼一身年二十三于歸河陽
君甲申正月夫歸寔夫亡矣妾心死妾欲從夫姑曰止謂
我煢煢白首將何恃婦聞姑語涕泗漣謹從姑命殘生延
晨昏定省代子職仰事俯育茹苦相周全無何姑病婦亦
病牀蓐支離猶勤問一朝姑歿痛失聲強起支持撫姑殯
姑旣歿妾事畢泉臺此去隨姑側婦繼姑歿七十有五日
戚里聞之咸歎息吁嗟乎天嘉孝婦貞婦死猶如生庭前
三珠樹濯濯揚清芬

朝廷有詔獎且旌卓哉潘孺人事母事姑千秋名

長洲孫麟趾月坡

教子傳家學事姑如事親觀空甘守節安命善修身啼笑承顏色晨昏計_米其稱彤管美風俗自還醕

吳縣王壽庭養初

姑衰兒尚幼死且忍須臾夜月心同皎秋風病不蘇一身完節孝六載歷艱劬今日高樓畔猶啼返哺烏

小人亦有母棄養廿餘年自謂賢相若因之泣泫然河魚

三日患繡佛半生虔欲乞延陵筆芳徽與其傳

吳文清如爲立傳

長洲王叔釗拙孫

潘孝婦姓蔣氏年二十三歸事夫子相夫子侍姑嫜惟賢

香禪精舍集

卷三

五

與能厥聲彰彰生男三生女一不幸夫子中道卒悲風颺颺鬼車啾啾誓欲相隨地下地下不可得見堂上有白頭含辛制淚力任事育長齋終身奉佛維篤奮僿已傾釵珥已鬻鍼黹佐之以供不足一鐙寒夜熒十指徧皸瘃姑患心悸與同臥起早夜視食必誠時時飲泣吞聲姑病在牀父母繼亡哀慟不已遂中膏肓婦病方劇姑病又歿強起視含斂臨事不能畢從姑地下報夫子七十五日相繼死

長洲宋志沂去垢

吁嗟乎妾死爲夫死妾生爲姑爲子生生死兩者何重輕悠悠蒼天妾不負夫生死皆分明

一解廿三爲君婦卅二

喪其耦上堂別慈姑涕泣曰否否千鈞一髮兮爾身亦子
亦婦兮亦母 二解 機聲兮書聲三更兮四更與姑同臥起

爲姑親調羹嫁衣典盡十指裂冬缸慘慘知妾情 三解 皇

天不仁兮喪吾母喪吾姑姑喪母喪獨生何爲乎不如殉

姑歸泉途泉途可以見我夫 四解 嗚呼母有三子季曰鍾

瑞我所知自云早失鞠育未報慈母慈嗚呼有子如此母

之苦節甘如飴 五解 大吏告 六解

天子

天子曰俞詔太史大書特書表鄉里書曰長洲潘某婦蔣

氏道光十年四月廿有三日以毀死 六解

香祖精舍集 卷三 詩

吳縣陶 浴翔之

愁絕慈姑病夫亡幸有兒婦賢能代子母教實兼師節鍊

冰霜氣心傷帖記詩此身甘就死扁鵲總難醫

寡鵠彈孤調親闈色養溫諱貧供酒肉扶病奉晨昏地下

無遺憾機邊有淚痕貞魂今化月綽楔始旌門

元和顧 影鏡府

暗雨打窗鏗欲死粉粉哀鴉飛不起一朝鸞鏡痛分離誓

欲捐軀殉夫子姑乃危言慎莫爾汝死吾身將焉倚操持

全賴一身兼不爾晨昏誰甘旨吞聲掩泣試艱危家庭事

事勞親理鍼綉不足供米薪時開奩篋典簪珥長齋繡佛

伴燈檠詎料夫亡姑又病當時忍死因姑在曲紀姑恩奉
姑命卽今姑沒何獨生好向泉臺尋舊盟七十五日相後
先卓哉大孝完堅貞吁嗟乎人生百歲終有盡問誰形史
永垂名

吳縣王遵義平叔

昔我至甬上道從娥江行仰瞻孝女廟千載揚芳馨茲讀
孝婦傳俯仰餘哀情倫常一今古至性表真誠從來烈婦
殉夫求速死投繯絕粒皆錚錚祇緣堂上有邁姑苟延殘
喘保餘生捧盤匱調湯羹有姑乃有身姑重身遂輕身瘁
撫兒女姑病祈神明不我佑泣血徒吞聲沈綿牀蓐
難支撐相將追逐歸瑤京哀哉潘孺人孝行特出閨中英
卽今

香禪精合集

卷三詩

七

長洲姚大鐘

鴝別心先死雞鳴淚未乾姑年需婦養子職代夫完大義
喪能守餘生力已殫夜臺隨侍去苦節世應難

吳縣雷浚石可

女子之身丈夫之身夫死婦死二姓一身一解兒子之身

父母之身兒死母在孰潔晨昏二解婦身夫身婦身子身

夫身殉夫子身養親三解夫棺在堂姑病在牀六年竭蹶

地下心傷

四解

夫死不死畱用養姑姑死未死泪眼先枯

七十五日相從九泉姑死卽死下慰所天

五解

婦母氏蔣

曰嬪于潘年三十二痛傷離鸞三十八歲哭姑而殞吾爲

此詩用式閨壺

六解

吳縣王

瑋若溪

天地有大經厥惟忠與孝忠以孝爲先百世畱風教誰知

巾幗賢慷慨志行堅瑤池冰雪操節孝且兩全吳下有潘
母在家傳孝友迨年二十三滎陽配嘉耦入門善事姑甘
旨豐且腴晨昏同定省出入隨步趨相夫主中饋屏去珠
與翠井白代姑操不教瑣屑累姑喜婦賢淑向平願慰速

香禪精舍集

卷三

詩

八

頻年蘭桂添含飴慰我獨如此歷九春孝名滿比隣方期
餘慶遠同事白頭入悲哉事机隄鸞鳳慘將別百計苦禱
求一夕竟永訣仰天血淚并立誓不獨生摩筭同有願義
重身可輕姑云爾且止爾我同生死爾若殉以身我亦長
已矣子女矧穉幼教養待成就欲慰泉下人死節不如守
強起忍辛酸晨夕淚不乾仰事并俯育一身兼爲難家風
況儒素倉儲亦有數滄灑與蠶鹽時拔釵珥付事姑十餘
年姑老病纏綿侍奉時在側寒夜常不眠歷久如一日姑
病心惴慄飲泣不出聲歡笑強慰恤時維己丑冬忽傳母
疾凶力歸奉湯藥一慟慘搥胸從此瘵疾作委頓臥綺閣

兼痛姑病深精力日衰凋遣人侍姑前愁緒刻縈牽牀蓐
虔誦佛猶冀姑速痊詎料姑棄養慟哭天空仰含殮扶病
來親族咸悽惻積勞侵二豎星忽墮天姥計與姑歿日相
距七十五生既同姑處死亦隨姑去生死此一心抑鬱誰
可語幸矣兒成名鬻序早蜚聲大吏採風至請將孝婦

旌

鸞誥下蓬戶閭里羣鼓舞彤管書孝行孝行炳千古

長洲陳懋德仲孚

夫有婦偕事母婦有夫偕事姑姑恩未報喪所天迴腸兮

九折雪涕兮漣漣

一解

婦身恥獨活姑恩何忍割割姑恩

香禪精舍集

卷三詩

九

曠晨昏爲死者死殉夫身爲生者生慰夫魂

二解

生死自

裁量吞聲不敢揚含淚承權笑烏可使姑知我之悲傷姑

若知兮摧肝腸

三解

姑不知勉自支含飴姑娛老養姑兼

育兒

四解

兒未成立姑衰老傷哉貧也心如擣典簪粥珥

年復年只求春永北堂草

五解

年復年兮愁更愁愁復愁

兮病相售姑雖無恙兮婦病弗瘳

六解

婦病未歿姑病已

死視含視殮痛入骨髓一慟撫棺遂不起撒手泉臺偕逝

矣

七解

待泉臺婦孝哉煌煌綽楔

旌門楣冰可飲蘖可茹千秋苦節昭來許至今彤管寫徽

音榮陽之婦蔣家女

八解

長洲陳廷謨季猷

一自歌黃鵠承歡制淚痕若教虧子職胡以慰夫魂大義

蛾眉重頽年鶴髮尊卒瘞嗟手口愁爲譜姑恩

宛轉升堂乳淒涼隔戶綦生前拚其命死後忍相離體自

依蛩厝心堪驗卷施

旌門輝綽楔燕翼集蕃釐

長洲蔣師晉調笙

乾坤扶植惟彝倫或爲孝子爲忠臣捐軀亦足成其仁周

全委曲心尤純殉夫烈婦詎愛身雙死鴛鴦比目鱗遺雛

甫及髫髻辰高堂復有頭白人爾時一髮引千鈞仰事俯

香禪精舍集

卷三

十

育甘遭迤我家六姑淑且真嫺習禮儀性謹醇婉容柔色

曾笑顰一編內則行能循甘三爲婦主繫蘋作嬪榮陽家

食貧操持不辭兩手皴博得尊姑歡意臻三男一女鍾詵

詵夫耽學業工磨磷邁染時疾辭紅塵九年一瞥馳騰輪

椎心泣血愁無垠誓拚一死何途巡尊姑勸勉大義陳忍

悲制淚聽諄諄從此奉佛皈淨因長齋日嗽筍與蕘事姑

益謹勤昏晨潔茲滌滌有常珍教兒誦讀延師寶釵珥典
質供米薪十指駮塚煩鍼紉姑病惡囂患顛胸約束騏驥
膝下馴勉爲懽笑飲泣頻伊鬱深中六度春遂攫篤疾危
且瀕歲厄已丑慈暉湮尊姑之逝惟庚寅姑時項折常吟

呻委頓牀蓐難躬親口誦佛號誠通神數問安否詳致詢
姑歿一慟苦莫伸起視含殮麻衣新黯黯泉臺孰問津相
隨溘逝纔七旬姑之節兮堅松筠姑之孝兮聞姪媼周全
委曲厯苦辛表揚允合膺

絲綸式昭千禩鑄貞珉行看後起皆瑤璘束身儒雅何恂
恂歐陽家法知所遵

長洲蔣元達慶甫

作嬪榮陽日行年二十三習勤身敢愛奉養性能諳雨苦
棲單鵠春寒鬻幼蠶形神嗟子處只許證香龕

彈指六年馳高堂易簀時憑棺親含殮入夢願追隨路遠

香禪精舍集

卷三

十一

白頭去燈昏紅淚垂慈暉長在望彤管續風詩

鎮洋黃 罈雪蕉

妾欲殉夫泪盡眼枯願瞻堂上誰其事姑姑生妾生心力
與傾釵珥質庫以奉湯羹姑死妾死嶭嶭骨體見姑黃泉
慰夫子三雛泣血求母不得無負孝思史傳可列

祥符周星譽令施

結髮事人義終始從死不難難不死

一解

離離陵茗白華

絳跼宛宛鴛鴦化爲孝烏妾生戀夫妾死負姑上堂入戶

中心踟躕

二解

膝下何有呱呱黃口兒死代兒有新婦新

婦而死誰奉阿母

三解

姑繒裘妾弋綈姑肉梓妾哺糜中

裙械窻榛栗梨姑瘠妾瘠肥妾肥紉箴十指血出漉空帷
霜燈雞膈膊面姑笑媼背姑哭四解當寢不脅當沐不膏

姑身妾心七年一朝下牀扶掖上牀敬抑搔姑病有喜妾
病作妾病雖深妾不覺五解參苓尤矣灰釘漆矣姑棄妾

矣妾事畢矣北辰高高下照當心孝婦殉姑死距姑七十

五日惟夏四月年庚寅六解孝婦誰蔣清門長適潘詩禮

孫結髮事人義終始代夫養姑爲姑死地下隨姑尋孝子
七解

常州呂耀斗庭芝

純絲緼朱紘貞材斲文梓彈作中閨吟清霜繞繁指寡鵠

香禪精舍集

卷三

三

鳴西隅悲風夜深起烏鳥號北堂銜土靡所止峩峩金閨

亭宛宛孝家里相門得女宗屹維風教砥孰醕承威姑力

貧勸夫子何期天露纏中道墓碣委秀面對高堂舍生諒

非是麻衣拊諸孤總筭治滌灑未亡兼子職茹辛出甘旨

皇天降荼毒駢哀奪怙恃殷田致骨立餘生積百毀卒耐

返堵門病姑復在笈侍疾力未任身代日祈死北斗竟不

靈殘喘尙何俟殉姑得從夫泉下樂方始事姑不終喪賞

恨猶未已生號行義瘞沒配禮宗祀獨行愧悅巾懿誦流

瑄誄航航三喆興母教夙瞻企節孝昌其宗食報信諸理

遙式雙闕崇作詩告良史

吳縣張源達子

所不敢忘垂老姑所不能捨貌請孤不然相從地下殉我
夫手拮据口卒瘡其上待余養白頭有老烏其下待余鬻
孳尾方將雛俯仰上下不遑息繞樹三匝呀呀呼將雛猶
未畢老烏忽云徂天日黯慘愁雲驅此時子影誰爲徒追
隨姑後尋我夫於冥塗霜中之艸不蕪女貞之花不枯生
生死與姑俱將毋雖死猶生乎

長洲張源楹豫伯

漫教身世擬松筠一曲姑恩淚滿巾循彼蘭陔愁不腆補
將蘿屋敢言貧人完至性無生死天遣貞心歷苦辛至竟

香禪精合集

卷三

詩

三

溫風迴暖律

雲章兩字永千春

吳縣汪藻鑑齋

吳中論望族榮陽我渭陽猗歟外大母與大母同行家法
務清肅壺儀祇慈良貽及我舅氏三鳳鳴鏘鏘仲舅我所
師伯舅惜早亡季舅尤習熟見時方壯強我年十有一季
舅歸北邙始氏出於蔣長妯同居孀時謁外大母小子登
中堂大母患眩悸子婦都在旁厥惟季始氏樓居通連牆
聞聲輒先至晨昏必周詳惟姑意所適體貼能安康獨憐
於氏弱善病身羸庭侍姑若無恙猶作平時妝蓂苓不自

服殷勤供藥湯誦佛持長齋永壽祈梵王以身代夫子以
心奉尊嫜下以迨鞠育衣祿與餼餽賓筵具雞黍師座羅
酒漿十指所取給百事無佞張俄聞於氏家母歿兄旋喪
哀痛迫勞瘁夙疾增頽唐況又邁姑病兩病殊參商憤恨
失侍奉枕席心徬徨一夕婺星隕驚魂呼蒼蒼強起視含
斂扶持近俠牀淚下如縻縷項折難低昂儼然欲傾仆戚
黨咸悽惶從此益沉篤二豎居膏肓七十有五日隨姑登
仙鄉仙鄉雖杳渺孝思彌悠長冥冥儻相聚差慰兒夫望
死者無遺憾生者有餘傷哀哀返哺烏月落啼未央願以
乞良史彤管傳芬芳願以顯大吏奏牘陳

香禪精舍集

卷三

詩

十四

天閭懿媿不終沒

綸綍頌煌煌

旌之曰孝婦兩字榮千霜由今思曩昔耿耿心未忘記當
庚寅春小子初游杭外家遭大故我時列膠庠歸里拜靈
廡多事知匆忙入省矧氏疾麻衣樓閣房見我謬獎借語
我雙眉揚汝舅昔賞志無命空文章諸甥十餘輩宅相期
誰當喜汝出頭地先采芹宮香他年應直上雲路凌康莊
恐我不獲見地下瞻翱翔願謂小弱弟入齡倭髻郎四書
讀纔二五經猶未遑愛憐亦徒爾成立遠難量語此轉哽
咽承涕盈兩眶詎意不匝月離魂遽飄颻耳聞尚如昨卅

載馳景光不復見
姒氏但見表崇坊
半生荼蘼味苦辛
亦云償當時小弱弟
今克承青箱
當時弟弱小
舊事想茫茫
我今道瑣悉
一一惟家常
相呼類行雁
相語同寒蟿
勿以詩格繩
眞率由衷腸

吳縣劉禧延辰孫

誓欲死夫已亡
勸勿死姑在堂
眠抑搔起羹湯
寒與暑星與霜
矧呱呱小兒女
身褻襁口哺乳
年復年給十指心
瘁也病來矣病來矣
終不言在姑側
仍笑顏老人意
眉宇間體之先承之久
姑樂之有此婦
婦健在姑長壽
姑病衰婦病劇
思侍奉奈牀席
終天恨痛魂魄
上蒼天下黃泉
婦中

香禪精舍集

卷三

詩

五

處姑渺然願姑婦
相後先誦佛號
億萬千血淚灑
梅檀煙神降鑿來
仙輶歲庚寅
夏四月距姑喪
七旬日嗟孝婦以
毀卒孝婦誰族
樂安二十三嬪
于潘三十二悲
離鸞越七年
身益棺心力竭
名節完作歌詩
清風寒

秀水周閑存伯

至行肇庸常履蹈
貞流變彝倫植志
節殊絕在閨彥無
違夙敬戒媿德里
黨淡暉勉趨庭
惟有無助耕硯學
豐命獨奮赴召修
文遷高堂泊遺雛
捐棄亮悽戀夕釭
勤哺乳晨萌深蘭
膳繫維百胙理庶
與九原見忍死義
不斂繕性骨自鍊
冉冉依春暉忽忽
轉颺電姑恩一曲
斷若爲妾身先

精誠所追躡鬼神爲幹旋杜鵑泣落月卷施蒙集霰孝子
思不輟扇芬資藻絢祗慚風人篇尙待范史傳

海鹽陳德大容齋

樹陰高下叫慈烏補就危巢尾畢逋猶是總帷涼月夜不
知燈影爲誰孤

于歸有妹仰璇儀扶下青廬廟見時不逮羹湯我手奉含

愁寸艸自心知

余休爲太孺人兒婦
于歸時服母喪未闋

海鹽陳驥德良齋

事姑兼育子心血半生枯破壘梁聞燕棲音月下烏傳諸

千古永慰得九原無我負春暉久當年亦病軀

謂先妣
楊太宜人

香禪精舍集

卷三

詩
十六

仁和鄒在衡蓉閣

噫吁嘻潘孝婦樂安爲淑女滎陽作嘉偶夫有老母婦無
舅隨夫奉姑相先後夫勤文史婦營升斗何有何無如賓
如友奈何夫不壽奈何婦獨守噫吁嘻婦有姑兮有兒女
欲殉夫亡姑不許日日侍姑側夜夜同姑處烈日堅冰耐
寒暑身雖抱病口不語噫吁嘻婦病姑病兩病難支身在
牀蓐心惟姑依擁衾誦佛求佛來醫醫不得萱陰隕哀鴉
泣血淚盡日月爲慘悽風雲爲悲憤七十五日以身殉孝
婦純孝思行義呈有司咸豐己未上溯道光之庚寅

詔下二十九年稭地下孝婦知不知噫吁嘻

江甯潘一鐸木君

芳華嗟短日貞木動悲風暫忍須臾死長教旨膳豐冬初

十指裂夜課一燈紅珠樹高巒序

衰榮詎可窮

曹宗瀚嵐樵

守節能兼孝精誠世所難親衰萱室暮佛古夜鐙寒養志

神常瘁銜哀淚不乾九原人可見相對此心安

忍死緣姑在姑亡病轉深追從如恐後含斂尙親臨已報

三珠樹難酬五夜心

熙朝衰至行綽楔煥

香禪精舍集 卷三 詩 十七

綸音

江甯何兆瀛青士

嘯聲悲寡鵠來女貞花寒不開傷哉柏舟人良人逝矣我

何以生為 一解 良人有子我身可以死良人有姑誰代為

之子阿姑流涕言爾姑猶存爾曷可以死 二解 堂上白髮

親地下黃泉身白髮待我娛晨昏遂使黃泉之魂獨來獨

往慘不春 三解 三世如來佛一卷蓮華經誦經禮佛佛知

我心願佛大慈悲佑我康彊之姑壽百齡 四解 天乎太酷

折我風木我病姑歿我歿姑瞑目依然奉匱換杖地下相

追逐良人見之淚簌簌嗚呼節孝完人賢且淑表此可為

子臣鵠

六解

上元潘敦儼清畏

淒風入孤幃素月照獨處遭命何奇薄悠悠幾寒暑養姑家且貧殉夫姑未許匪石心暫轉涕淚紛如雨姑膳日以甘婦心日以苦可憐賢婦心猶謂孝無補斂不憑其棺遺恨復誰語殘魂附姑去地下慰酸楚婦職此方終綽楔耀千古

無錫錢 助揆初

摧頹樹背萱荏苒待霜竹指驅殉夫姑失養忍死侍姑夫
瞑目古來苦節有兩途仰事俯育情則殊撫兒在襁褓容

香禪精舍集

卷三

詩

十一

有私愛憐呱呱制淚登高堂子職兼盡償勞劬不辰生世
終天徂以身殉姑仍殉夫卓哉高行風三吳妾身有夫夫
有母以烈易孝稱孝婦海枯石爛婦不朽

嘉興沈宗濟香署

節烈世所矜尤貴處死難況婦代子勞盡職斯志完猗歎
榮陽婦孝行在室端作嬪事威姑婉婉能承歡結褵未十
載鏡影泣孤鸞一念矢靡它相舟節不刊姑老相因依慰
語涕汎瀾因之撤環瑱強起問煥寒食蓼兼茹茶膏飮屏
勿餐心枯力亦瘁疾甚謝藥丸姑幸天年終婦病亦摧殘
奉養事已矣從夫願久拚含笑入地下耿耿此心丹嗚呼

節孝行冰雪厲嶢屹婦能全子道忍死循陔蘭歿存均無
媿義盡心固安擬古齋曰碑遜此中哀酸貞行砥薄俗清
波激迴湍區明此風烈闡揚賴史官

寶山嚴錫三

艱危生死際大節世閒難孤立夫心慰姑亡婦道完泉臺
兼侍養魂魄再團藥遣行貞珉勒千秋永不刊

寶山嚴沐涵

大義倫常信不誣忍將一死棄諸孤葛衣薄澣心依母箠
火長寒影伴姑永夜魂歸難訣別當年誓在肯踟躕懷清
高築貞珉勒亘古冰心照玉壺

香禪精舍集

卷三

九

上海周志源少白

節孝松節閨儀胥尙忽愴藁砧且瞻堂上一解為兒為父

代夫子事姑身妾養姑壽天賜二解天降鞠凶妾追姑蹤

七十五日地下相逢三解慈烏失育遺雛悲哭瀝血表章

千秋敬肅四解

上海侯 敬梅衫

綱常拄天地孝為百行首孝子世已稀孝婦更罕有以婦
修子職卓哉榮陽母所天痛先亡之死矢無負堂上奉白
髮膝下撫黃口且迴激烈腸獨運扶持手事育一俯仰義
盡情乃厚六年隙過駒西昃慈暉壽竟向夜臺從終勝空

房守先後閒七旬追侍魂左右敬或尸蘋蘩勤或躬井臼
庸行亦足多方此邈無偶
旌表門閭崇稱揚鄉黨久可與古孝子並垂名不朽

元和袁柳景五

我讀列女傳儀型皆可觀
奠劓戮俎嬪則備三從四德婦
道完詎知人事有常變
誰處歡樂誰辛酸
怡尊章捧匜盤
相夫子齎鳳鸞裕後嗣
培芝蘭繁豈不願
盡如此百年聚
順長團樂一旦冀
砧化對影成淒寒
上顧威姑種種老下
顧弱息熒熒單
此時求死不得死
百念委曲心煩
冤承姑色自愉
背姑淚未乾
志似陶嬰義似桓
蒼蒼者天何不寬

香禪精舍集

卷三

三

竟奪姑年下玉棺
椎胸泣血摧心肝
七十五日命畢拚吁
嗟乎死孝易生孝
難死孝一時激于氣
生孝一息心難安
嗚呼死孝生孝非
兩端瀝誠上籲
天恩溥芳徽大書
煒管丹日惟孝婦
氏蔣于歸潘

吳縣汪錫珪秉齋

姑恩纔唱又將雛
計及生存事正劬
倘殉黃泉徒一死
奈遺白髮藐諸孤
空山淚灑旋生草
破篋衣單亦御蘆
婦職既修兼子職
問堪慰藉九原無
椿萎萱彫淚幾行
勉承色笑侍高堂
素甘冰蘗齋長奉
屢進羹湯藥並嘗
勤苦半生兼事育
扶持一路到存亡
誦芬

便是歐家表我更儀型溯渭陽

元和葉廷瑄調生

六年孤燕病難禁兩月嗚烏痛更深代子職原完婦職殉

姑心卽體夫心兒能補恨形編播

子鍾瑞撰行略徵傳諱得邀旌典距孺人歿已二十七年矣

女

善傳芳碧水沉

文適哭早孺庚申四月殉蘇垣之難死於水

懿德久潛終必耀陽利自

古出窮陰

青浦金熙二溪

何謂爲孝用以事姑何謂爲節用以殉夫何謂爲慈用以無孤三者畢備僅有絕無孝根天性節秉義樞從生入死如鼓應枹蔣侯有妹掌中視珠潘郎有婦堂前御輿結襦

香禪精舍集

卷三詩

三

九載承歡與俱分飛一旦誓死勿渝夫死當殉其奈姑乎共命有烏返哺無烏夫死當殉遺孤藐諸不省所怙違恤將雛晨羞夕膳予手拮据長齋繡佛予口卒瘞樵架簞席茗盃藥鑪色常見憚聲不待呼甘祝啖蔗苦忘茹茶無冬無夏靡朝靡晡一樓寢處兩病支吾身懸白髮心寄黃墟游塵棲鏡暗淚積裾春秋匪懈日月其徂蔣山艸宿蔣徑竹枯鸞愁鳳慘母歿姑殂拊牀一慟絕而復蘇哭姑不起拜姑難扶桐悲心死梅憐骨癩人閒事盡地下步趨采蘭夜壑獻椒泉閩融融洩洩母子如初孺人之孝天地感孚孺人之節松柏堅如宜其彤史大書特書宜其

哀錫破格

恩殊慈孫孝子百世令模閭風興歎嗚呼歆獻

青浦金 玉縵鴻

豈惟節可紀孝事白頭姑堂上養無缺燈前淚已枯呼天
驚老病入地慰亡夫此日輝彤史鴻文藉貌孤

常熟許 洛菊帷

苦節追前哲酸心動後人事姑終合禮生子盡超倫卓著
霜筠操同傷風木神濡毫題紙尾老淚一沾巾

江陰季念詒君梅

貞松多勁節古井無迴瀾猗歟榮陽母所處良獨難結禱

香禪精舍集

卷三 詩

三

甫九載熒熒形影單誓欲以身殉姑在心不安忍死盡婦
職竭力奉旨甘長齋繡佛前常願姑加餐天奪我姑速涕
泣摧心肝回首六年前早已一死拚仰惟姑在堂朝夕強
承歡今茲婦事畢婦志亦已完先後閉七旬地下相追攀
旌節格於例旌孝永不刊表章勒貞珉綽楔

天恩傳

江山劉履芬彥清

守節與撫孤古者稱庸行庸矣何獨難一往要至性
姑病姑向愈夫亡夫不亡子職婦能代視膳羅酒漿
危樓一燈然照見婦夜織啞啞慈烏嗁數行清淚涇

孤兒今已成婦病歸蒿里黃泉見夫婿握手大歡喜

吳縣吳恩熙苗青

古昔有孝婦曰惟鄭與郎疇其媿前軌懿行推榮陽

一解

榮陽之婦樂安之子少侍雙親芳侔蘭芷于歸奉姑歡承

甘旨

二解

天胡不弔悲茹荼鳳釵折兮鸞鏡孤妾矢志兮

殉我夫妾欲殉夫兮妾有堂上之老姑

三解

晨昏事姑亟

問安否疴瘠躬親扶持恐後一樓風雨六年中婦也依姑

姑賴婦

四解

姑有疾兮妾請代之姑既歿兮妾奚生爲於

厚妾不殉夫實爲堂上姑而今而後歸報地下之我夫

五

解大吏請於

香禪齋合集

卷三

詩

三

朝門閭

旌綽楔至行重千秋苦心經百折石可爛兮海可枯孝婦

之孝永不減

六解

上海江承桂馨山

忠臣死所事烈婦死所天一死原不難難在節孝全矯矯

蔣氏女事親禮致虔廿三歸潘君曲盡內則篇羹湯必親

奉憐姑已華顛奉姑如奉母里黨稱其賢忽令妖夢幻血

淚愁鵝鴟甲申歲正月良入館舍捐誓欲以身殉玉碎珠

肯圓一痛不欲生食忍甘下咽死者其可追相見及黃泉

號泣拜尊嫜就死從兒便尊嫜悲且哭霍霍涕淚漣漣嗟我

薄命人藉汝以周旋仰事而俯育願終吾餘年孝婦強飲
食節愈窮而堅上以娛邁姑酒肉供必先下以撫幼子母
教慈還嚴家無擔石儲鍼黹賴織織長齋以誦佛祈姑大
壽延未幾姑患疾藥餌手自煎食必問甘旨日必同起眠
尊孀疾良已忽痛蓼莪編肝腸真寸裂終天恨絲絲哀慟
猝成疾愁苦相牽連庚寅歲二月姑病又淹纏姑病似兒
劇奄臥心常懸視問數遣嫗求醫質釵鈿回天奈無術天
姥峯頽焉孝婦拊枕哭吾病不足憐姑今舍吾逝吾可了
塵緣扶病視含斂淚枯眼欲穿夫死姑又死吾生獨胡然
姑歿七十日世界謝大千幸哉河東鳳序同翩翩有子
香禪精舍集 卷三 詩 二四

起書香裕後能光前

衰封下

綸閣永金石鐫媿我乏花管不能萬一傳闡揚待史筆
萬禩享豆籩載拜敬贊述用以誌拳拳

上海潘崇福容之

吁嗟乎上天下地不過磅礴區中間賴有人匡扶十二萬
年一瞬耳石有時爛海有時枯公卿將相豈不顯盛名不
久委荒蕪獨此至性至情相鬱積其壽直與天地俱男兒
勤勞死王事婦女節烈殉丈夫至行昭昭燦今古後人疇
敢訾其愚不知輕生一死固足傳死而無補烏乎賢一時

憤激祇淺見溝瀆之諒不爲然卓哉吾宗婦節孝能兩全
憑棺視含斂慟哭呼皇天夫死復何望思欲以身捐回頭
顧堂上白髮垂兩肩不難拚一命几杖誰周旋義不能苟
生勢不庸徒死區區殘喘不妨爲姑延以此忍死之身代
子職承歡勉強奉餘年鍼黹佐菽水事姑禮尤虔奉佛矢
長齋口腹戒腥羶姑老患心悸侍奉同起眠厥後姑病日
益篤婦亦積疾相顛連姑死之日婦不起哀毀砭骨涕泗
漣距姑之歿不三月貞魂相繼歸九泉苦節旣完孝思盡
皎皎此志冰霜堅

吳縣貝信三潤孫

香禪綺舍集

卷三 詩

三

七十五日繼姑歿三十八年完大節夫死含悲姑不知淚
痕漬枕股猩血兒弱女幼茹苦含辛仰事俛畜責在一身
冰霜黯慘病砭骨妾身安用蓑苓活妾之生兮爲有姑姑
死妾生胡爲乎仰天一慟神難扶幸哉孝婦生孝子至今
啞啞枝上嘯慈鳥

吳縣汪玉齡枚生

吳縣汪玉齡枚生

王衰廢蓼莪皋魚哭風樹丈夫高行自古難不意純孝闈
門遇我讀孺人傳俯仰悲辛酸九載鴛鴦夢不圓從夫不
難性命捐堂上有白髮膝下有黃口百念委曲摧心肝克
體姑心夫心安能代子職婦職完姑亡婦病血淚乾七十

五日絕塵緣三十八年大節傳吁嗟乎孝婦死孝子生名
士克家勝簪纓

帶錢塘王彥起硯香

匹夫經溝瀆烈士死社稷矯激非所難所難在完節鬚眉
且覲顏矧其中輟列戟戟榮陽婦大義獨無缺廿三詠于
歸滌髓盡內則卅二喪所天號哭繼以血夫死身可殉其
如姑頭白事姑如事母未亡代夫職仰事與俯育無一肩
可息昊天降鞠訕冰霜日慘裂一朝慈蔭摧曉烏夜深泣
姑亡妾奚生平慰黃泉魄頸折猶視含喉痺成篤疾三十
八年終七十五日絕惟孝節斯全精誠貫金石文章壽貞

香禪精舍集

卷三

詩

琅華滋

恩榮旌綽楔庭前三珠樹母教秉懿德歐陽有家法瀧阡
嗣曩哲崇閱金閭門石泐姓不滅載揚焯管芬光炳泮書
冊故

親遊秀水孫

孝婦氏蔣氏逾笄始歸潘練褰帷髻相夫子未及主載噓
孤鸞

心帶縮盤龍鏡不照紅妝照衰經

亦易爲欲死不死涕綆縻上有白髮姑下有黃口兒

篝燈營十指朝夕供甘旨深宵擁姑衾抑搔扶持不待姑

指使四解三子一女繞牀相隨仰事俯育一身兼之視十

五年如一日苦荼習茹甘如飴五解母氏忽云徂哀哉悲

填膺無何姑病亟黯室慘昏燈扶病痛視含折頸有聲聲
與哭聲磨六解越七十五日一病已入膏肓深含笑指地

下自今喜獲奉母事姑隨藁砧七解鄰里戚黨咸淚墮噴

噴贊歎無或左謂爲孝婦可謂爲節婦可懿行上聞於

天子

天子降詔亦曰可八解

元和袁學瀾春巢

孝先百行人所難婦人能孝婦道完孝婦居鄰仁孝里幼

香禪精舍集

卷三

七

潔蘋藻同季蘭及笄自蔣子歸潘夫歿撫孤篝燈寒晨昏
事姑姑心寬姑病理湯藥姑健親盤餐天奪姑年摧心肝
七十五日憑姑棺隨姑地下承姑歡零丁兒女啼聲酸閭
里族黨盡悲歎彤管揚芳載史官我謂生死行孝分兩般
死孝於禮終非安

朝廷旌孝不旌烈恐開民俗輕生端以死奉姑事過激中
庸有道法可觀承先啟後婦責重豈得輕將命自殘教子
義方昌世業經營荻訓修能凡一旦捐軀失所恃留遺孺
息形愈單此言我特論其正大德原難一例看所嗟輓近
風教闕臨難赴義多盤桓封圻重臣崇爵祿遇寇侵境雙

眉攢媪生潛逃棄城邑畏死從逆甘作奸覩顏求活罹憲
網報國全無心寸丹豈若孝婦秉節操血性凜凜莫可干
視死如歸殉烈志居然巾幗勝衣冠嗚呼孝婦居然巾幗
勝衣冠會見

紫泥錫誥頒

金鑾

元和陸懋修九芝

峩峩綽楔金閭道郁郁祥雲長繚繞行人競式孝婦門足
爲閭閻樹坊表孝婦氏蔣嬪於潘相夫九載琴瑟歡所天
不幸一朝殞歿血誓死摧心肝衰姑年已老向婦婉轉說

香禪精舍集

卷三

天

而何不念姑髮白而夫已亡而更死誰代而夫盡子職婦
聞姑語泣涕漣姑在何敢忘姑年良人地下且少待殘生
合爲吾姑延家貧曷以奉甘旨菽水之供仰十指豈惟定
省無少違直與晨昏同臥起病不求醫非毀身姑病弗藥
且爲貧若云口腹事已細敢便因病忘艱辛持齋惟願姑
納福視膳方殷哽噎祝豈知姑病彌留婦更支離氣難
續嗚呼婦已淚眼枯天乎胡更奪我姑養姑事旣自此畢
可以地下從吾夫此事藉藉滿人口閭里皆知潘孝婦從
來孝婦家天必昌其後亦賴有令子足以傳賢母卽今吳
乘正修輯垂之彤管期不朽

嘉興唐翰題蕉庵

塵世姑拋婦泉臺母見兒揭來蓋棺日猶是殉夫時曲有
恩須紀愁無藥可醫今看形管燁血淚染斑枝

長洲葉昌熾菊裳

榮陽婦系蔣氏歲維乙亥作孀夫子時生二十有三年戚
黨尊行莫不嘖嘖新婦賢結褵未廿載別鵠摧驚絃妾心
自信古井水地下何難殉夫死妾死不足惜何以代夫供
子職上有白髮姑下有黃口之兒索哺啼呱呱妾身爲子
兼爲母仰事俯育支一手從此長齋繡佛前一燈漆室風
穿牖天何不良父母尊嫜相繼云亡婦心兮滋戚婦病兮
香禪精舍集 卷三 詩 无

古型

元和顧大昌子長

潘子示我一卷書臚列表揚孝婦辭湛心細讀未及半悻
悻惻惻涕淚垂其事雖與吾母異堅苦與母無參差吾母
懿行不能述呼天搶地哭孤兒孤兒忽忽頭已白無顏一
讀蓼莪詩天何蒼蒼山崒崒水何澹澹雲飛馳還君詩卷
益大慟吾其立志去求師

顧大昌再題

龍馳起陸春雷動猿鶴悲鳴秋夜長卅載孤墳卅里路短
鐙影裏意茫茫

不省年華又一時做廬墳墓費支持寸心欲報三春德敢
說區區幾首詩
匪莪隱痛頭顱白有待恐辜
誥命單惟有守身如執玉斯時堅志不求官
此生艸艸獨酸辛幸有常華各占春君得里人偁曰善苦
心卽是報雙親

吳縣楊引傳薪圃

菱花鏡破誓從夫忍死須臾爲奉姑一曲悲涼彈別鶴十
香禪精舍集

卷三詩

三

分艱苦報慈烏米鹽瑣屑神俱瘁骨肉摧殘淚亦枯身後
表彰更何及皋魚抱痛是遺孤

錢塘夏曾傳薪卿

人生無奇厄誰能見奇行心苟金石堅造物亦退聽施報
非所謀純孝出天性卓哉滎陽母名實允相稱矢節六年
中憂危雜貧病忍死以事姑姑死事乃竟相依赴泉臺秉
志夙堅定乃怪天心奇窮通孰操柄往往溫恭人憂危一
身併毋乃顯其操風疾艸斯勁大吏重表章

旌題荷

恩命鄉里景芳徽遺跡光志乘令子爲通儒才名方鼎盛

明德必有後充間可預慶行看表瀧阡鴻文互輝映

元和蔣德澂樨薈

九載相夫主中饋比肩盡孝成不置罡風吹折連理枝玉
樹英英頓摧萎椎心一哭血淚流兒纔黃口姑白頭顛天
欲灰灰不得止嗝爲解姑憂愁家貧何以奉甘旨鬻盡金
釵與珠珥釵珥鬻錢苦無多綫腳鍼頭勞十指夜夜寒燈
達曙光堅冰深雪冷閨裏蒼蒼者天何不仁復使多病長
吟呻勉強支持奉滌滌殫竭心力疲精神一朝姑歿婦亦
歿相距七十有五日隨侍泉臺夙願償始終無媿四賢德
吁嗟乎如斯淑行傳清門分光戚黨推同根婦人爲同
高祖姑母從來

香禪精舍集

卷三 詩

三

純孝膺福報不於其身於子孫

來安孫 照子明

我聞自昔陳孝婦夫去從征尙無後自云生歿未可知汝
肯終養吾母否夫言未畢婦早喻登車就道沙場走藁砧
一去不生還噩耗驚心欲斷肘慈姑勸止其相保高行遂
聞於太守太守上聞天顏喜黃金賚錫名垂久以蔣儼陳
德何如上下千年信堪偶上事邁姑下撫孤儋石之儲室
無有釵珥粥後典衣裳佐以十指纔餬口承歡侍食日無
閒坐臥不離姑左右父母繼逝兄又亡竭力支撐不釋手
從此病根伏益深猶自殷勤養白首來日苦少去日多一

瓣心香顚姑壽詎料姑疾難終痊泉路追隨誓不負更有
弱女似母風舉止嫺雅性溫厚二十有三歸于吳功容言
德如其母連遭大故嗟衰門無子更憐虛瓦缶身雖存兮
心早亡風中枯竹泥中藕庚申四月慘遭劫范莊赴水寒
閨友嗚呼母孝女復節孝母節女同不朽

吳縣曹毓秀實甫

夫早世生慰姑姑復亡成隨夫年三十二成獨處上奉衰
親下藐姑孤燈瑟縮寒裂指六年心血瘁於此姑疾革婦
病呻姑婦同成相距七十有五日而今而後可慰地下人
嗚悖慷慨赴成易從容就義難卓哉滎陽母孝節千秋看
香禪精舍集

卷三詩

三

吁嗟非此母不能生此女天欲試其節夫與姑俱逝夫成
幾年遭寇亂闔閭城中痛糜爛婦曰不灰將何爲一笑完
貞此其時成於一片乾淨土天地鬼神實鑒之生不苟成
不朽吁嗟非此女不能肖此母

鄞縣陳康祺鈞堂

蔣氏女籍姑蘇年二十三始有夫夫名遵範姓潘氏相夫
九年夫告殂仰天大呼聲咽淚枯天奪我夫盍喪我軀姑
曰嗟哉宜緩圖爾縱不念爾子爾女雙孤雛爾姑白髮誰
賴乎婦聞姑言強收淚姑在一日婦與俱姑有命堂上趨
姑有病牀下扶姑曰飢調甘腴姑曰寒裁衣襦孝婦孝如

此天道終模糊昔時喪我夫今時喪我姑昔時無夫猶有
姑姑今又歿何生乎仰天大呼聲咽淚枯朝亦烏烏暮亦
烏烏姑歿七十五日婦亦殂孝婦之孝如是夫孝行聞三
吳
天子旌其廬廬中何所有女貞高扶疏上有慈烏下有烏
雛烏雛夜夜呼慈姑喑嗟哉嗚呼世有烈女殉其夫孝婦
殉姑天下無

江甯司馬湘晴江

心傷黃鵠淚頻傾誓欲從夫入九京苦節志堅陳孝婦舊
家系出蔣元卿養姑畢遂生前事有子終揚歿後名凜凜
香禪精舍集

卷三 詩

三

貞風安可泯女臺也合築懷清

漢陽鄔 銓梅仙

哭母傷夫淚中懷已斷魂了還兒女累難報舅姑恩一歿
芳徽重千秋大節尊黃泉相見好含笑總春溫

太倉畢蔭笏搢卿

我讀孝婦傳爲作孝婦誦孝婦祭陽母清節凌峨峨夫歿
誓不生人天矢靡它仰瞻堂前姥涕泗交湧沲勉盡烏哺
私湯藥親調和下顧諸兒女飢寒勤撫摩泊乎姥云逝哀
毀攫沉疴素幃燈閃閃山鬼拳女蘿追侍九泉下此義同
曹娥沒世動

天聰

旌典沾天志

恩波魂兮如有知感慟應如何

吳縣曹毓英子千

姑婦相為命六年抱痛深閨中供子職泉下慰夫心貞孝

悲天地死生重古今門閭旌綽楔令我慕徽音

吳縣汪菡燕庭

至孝根天性夫亡事逮存婦能兼子職姑不異親恩荼蓼

平生味箒簞涕淚痕春暉君報得

曠典已旌門

香禪精舍集

卷三 詩

三

我抱鮮民痛松楸負土遲

生慈施太安人未營宅

芬承先澤遠善缺合

名貽抗志慙滂母傳經望

去冬舉一姪

瀧阡表何日雪涕此

題詩

吳縣汪麟昌子彥

身存為姑存身歿為姑歿六年泪眼枯成此冰霜節

嘉定王兆均平甫

煌煌綽楔耀姑蘇孝行千秋郎鄭符夫歿已教傷老母婦

亡誰更事慈姑閨幃慘澹雙眉結鍼黹勤劬十指枯要識

生平同穴志七年前早矢泉塗

大錢塘金樹本麗生

聖朝惟孝予旌視守節之以年例相格者有間其教天下以孝深且大矣如潘孝婦蔣太孺人從親從夫一以孝著是得天之厚固無待於教而教在其中矣磨生奉金常擴庭幃之聞見綜親族之交稱母作之子述之此奉太思錄之所由傳也動止必詳孺思彌篤磨生之夙願以帝申太孺人之琦行聿著德之端也孝之本也於戲尚矣敬增五言五首爲有婦職者勸

庸行復庸行獨支生所難鄉閭知有婦存歿庶其安熊菽無慙教羹湯每視餐孝思兼子職終古會團圞

人天交盡瘁生亦體親歡婦也身兼子夫亡義獨殫在家

香禪精舍集

卷三 詩

三

無間孝一病有生完大節秋霜瑩

殊恩定益棺

有子緡家乘文章繼孝慈詩書傳不賈貧病勉扶持懿則

天常備流徽

帝座知高風承母德孺慕永言思

未亡胡忍亡垂白有高堂十指潔甘旨一言堅雪霜透遲

金石厲倪仰灰生忘節烈驚人無奇孰可方

從容完大義憔悴曲承歡竊懼鬢絲白諱愁珠淚乾餘生

爲日短不藥此身拚寄語修文客同歸歲月寬

婦替佳兒職承歡盡六年苟延眞一息相慰及重泉伴寢
宵聽漏撒釵貧佐筵柏舟歌詠在節孝遜兼全

嘉定陸詒燕文魚

十八年中婦職勤霜幃六載薄天雲不旌節爲成章格但
有文陳至孝聞屬以名門尤卓著稱於在室已多欣閨型
流到所生女軼事延陵更出羣

上海賈履上雲階

夫歿不殉夫姑歿乃殉姑猗歟潘母不以節彰而以孝顯
豈因邀旌年例已逾爲此緩歿須臾孝姑不本誠區區夫
歿姑存代夫事姑不遽歿夫猶未歿姑歿婦隨尋夫行夫

香禪精舍集

卷三

詩

美

不再生婦敢貪生一家骨肉九泉聚依然月黑聞嗥烏渾
忘七年辛苦尾畢連母以孝顯孝非誣

國家旌典關激勸爲節爲孝無或殊要之正命宜順受溝
瀆小諒胡然乎不見一傳有女歸於吳早寡請旌年例符
忽焉賊至懼遭辱聳身躍入齊門湖吳氏全家同殉難

哀卹實異徒捐軀惟女不以節彰而以烈顯稱節爲輕烈
爲重史官握管心躊躅吾謂馨香俎豆竝千古他年母女
台傳信不渝

長洲王頌蔚芾卿

樂安女榮陽婦爲婦孝君姑爲女孝父母惠聞嘖嘖洽人

口一解 天何不弔藁砧喪雞斯拊踊神慘愴山頭石不可

望誓欲將身殉泉壤二解 殉夫繫豈難難在事未完上有

白髮姑悲酸下有黃口兒飢寒三解 婦心姑心職子職堂

上羅酒漿房中哺梨粟血漉漉十指裂漆室烏噤頭畢白

四解 姑前笑嘻嘻兒前鬱伊三男一女艱支措地下黃泉知

不知五解 母病歿姑病亟婦病淹淹俠牀側哀哉姑亾婦

志畢身強起項已折七十五日彌留儻忽六解 殉夫遺姑

殉姑見夫泉下一家骨肉俱烏瘠閨中曾閱閫內嬰白至

行良不渝七解 峩峩綽楔光門里鴻儒魁壘奮筆篆形史

孝婦之孝永千禩後起多才作名士天之報之豐于拾青

香禪精舍集 卷三 詩 七

紫八解

... 天何不弔藁砧喪雞斯拊踊神慘愴山頭石不可

孝婦蔣孺人題辭

男茂先鍾瑞謹錄

姪雷雨田

我家老屋謙益堂門前截巖瞻崇坊 五世祖母表節孝

謂五世祖母東白府君繼妯中太恭人大書深鏗名流芳流芳繼起迨四世懿行

貞心合符契隆名

旌孝不旌節非無其美格於例憶昔登堂拜諸媵被服尊

嚴列燕寢就中娣姒兩淡妝媵母顧宜人與蔣孺人皆寡居娣更清臞病容

甚聞道持家劇苦辛蘭羞潔養萱堂親朝侍盥沐夜衾枕

惟願愛日年年春春暉不似朝華長長代兒夫供子職呀

呀子女待長成來日大難十指力一旦慈姑我棄捐從前

香禪精舍集 卷三 詩

三

忍死嗟徒然扶牀強起項先折大地眩轉天迴旋自此沉

脈遽奄化在萬七旬從地下記別藁砧已七年子女拋離

萬事罷吁嗟乎一身苦節純孝兼宜邀

褒美光幽潛

旌之以孝略其節未逾十稔典章嚴我謂母孝堪不朽矧

嗣徽音 五世母素旂颯爽魂歸來伯姒在前季娣後顧宜

人先以節孝旌

姪霽晴初

繫人世之庸福兮樂聚順於家庭胡蒼蒼之酷烈兮迭降

夫冰雪與雷霆歷百味之酸苦兮秉一心之堅貞詎不可

以少寬兮至於斯而爲之玉成維叔母之懿燉兮在室先
以孝稱迨歸我叔父兮鼓琴瑟之和聲借妯娒以奉姑兮
幾嘗藥而調羹訝離鸞之驟唱兮剩單雌其何以生奈捨
生之未改兮姑龍鍾而孤咿嚶肩事育於俯仰兮耐歲序
之遞更勤箴紉於十指兮蘄堂上之百齡衣與祿而飲且
食兮望成立夫伶仃痛姑壽之不我待兮我抱病而姑歸
冥淚灑血而血盡兮聲呼天而天譴倘夫君其重見兮踐
素志於生平竟毀瘠以自殉兮亮企跡夫瑤京遺巢烏於
陰雨兮春暉莫挽其西傾感輶軒以采風兮謂孝行之當
旌顛

香禪精舍集

卷三 詩

三

天語而下逮兮表身後之令名忝猶子以陳辭兮附行雁
之哀鳴願更乞於立言之君子兮揚彤管之芳馨

夫弟曾瑩星齋

霜雪稟嚴氣松筠標勁姿筠枝託松蔭共耐霜雪欺當初
凌霄花春華無常期其下有小艸生香孕荃蘼高松挺百
尺覆瓦叨深慈喬柯有時隕寒綠空猗猗猗具秋節歷
折形離披飄風赴急雨松竹同凋萎寸艸心不拔鬢靄臨
寒池池中俯清影本根應自知下土天可鑒願乞湛露施
湛露沃枯竹竹實青離離似聞王祥哭春氣迴華滋仰瞻

松鱗茂清風貫四時

六世祖有松鱗別墅
遷吳後爲松鱗九派

夫弟曾綬絨庭

姑在夫先逝孱軀重萬金桑榆安暮景松柏勵貞心識性

羹湯外承歡水乳深忽凋蕙背陰銜石痛冤禽

豈不憐兒女其如地下何身猶殉夫緩力已撫孤多此去

追鸞馭頻年護燕窠從知完孝行心似井無波

姪祖蔭伯寅

世味如飴識葦茶就衰門祚一肩扶未亡人自慚夫婿忍

死身惟對老姑鍊到柔腸能宛轉生來血性肯踟躕九原

含笑完心事爲謝空巢返哺鳥

姪馥小雅

香禪精舍集

卷三

詩

甲

一本推先澤承家重報劉

九世生祖妣劉太碩人苦節四十八年獨居一樓長齋奉佛足不下樓以終其身

齋終繡佛獨處只危樓茹藥深深苦縣瓜葉葉稠何期標

勁節直可媲前休早歲慈姑侍深恩巧婦酬藁砧俄怛化

蕙背孰綢繆制淚辛酸咽承歡體貼周有齋陳藻管不匱

絮蘭羞兒女資培養賓師待束脩晨炊空手作冬蓄寸心

謀涸鮒方潛轍頰魴早餌鉤食貧完我分忍事避人尤忽

痛慈雲散難禁落日憂哀孱骨立黯黯斷魂游往昔身

猶待須臾影不畱儻攀青鳥翼仍殉彩鴛儔記我髻齡乍

分行少子猶時因紗幔啟每勛硯田稷仰見神常悴違知

疾不瘳婦姑相倚命戚黨共含愁可惜斯人逝無虧懿德

修蓬壺仙位業蒿里眾歌謳行事孤兒述風謠太史收

寵哀降

綸綽祭告酌松楸夢去慚康樂書來感子由徵詩向京洛

製誄乞名流麟生弟以所撰太孺人行述及清如吳先生孝婦傳寄余京邸屬為廣求題詠語自雛鶯學絲

還獨繭抽舊聞曾耳熟俚句費腸搜聊附鴻裁什同傳雁

足郵先寄歸題詞十餘家倚閭雲氣壽南望思悠悠慈親今年正七十

香禪精舍集 卷二 詩 望



五... 南望思悠悠... 自費... 語自雛鶯學絲... 還獨繭抽舊聞曾耳熟俚句費腸搜聊附鴻裁什同傳雁... 足郵... 倚閭雲氣壽南望思悠悠... 慈親今年正七十

潘孝婦詞

男 茂先 謹錄
鍾瑞

金縷曲

吳江楊廷棟東甫

簫奏雙聲歇正和鳴鷓鴣翼比峭風吹折誓死相從渾易
爾姑鬢驚看似雪念地下應添嗚咽茹苦含辛全孝養便
將雛力瘁何庸說燈燄冷共淒結 六年荏苒慈姑歿病
沉沉搥牀一慟命絲幾絕強起躬親衣櫥事腸斷幽明路
別算夢裏慈顏重接笑向泉臺隨侍去尙呼天飲恨遲同
穴殘淚灑暮鷓血

霜天曉角

香禪精舍集

卷三 詩

吳縣陳彬華小松

霜天曉角吹入寒蘿幄夢斷藁砧何處庭戶事伊誰託
憐姑衰病作恨儂真命薄一枕春宵風雨同化去瑤臺鶴

水調歌頭

嘉定程庭鷺序伯

五夜檣聲靜燈影倚寒篝鱗皴十指皸瘵鍼留佐蘭羞忍
便輕生死烈勉代兒夫子職人世爲姑畱妾病邁姑逝已
矣妾生休 冥鴟操冷鷓泣暮爓愁哀哀七十五日追步
侍扶鳩早分紅塵揮手除是黃泉聚首縹緲玉京秋鳳子

韻

天聽
天語表烏頭
大烏夜啼

吳江仲本湘王甫

洗手調羹巧全家都賴柔荑春暉在
再愁腸斷拚共彩鸞歸
償得茶心味苦競看

芝檢雲題當年月
罨霜團屋牘有夜烏啼

淒涼犯

華亭張鴻卓篠峯

梅檀漸熬微香裊
高樓午夜人獨梵
聲諷處長齋奉久顛
香禪精舍集

卷三

詩

天勤祝祝姑萬福
願長此依依骨肉爲兒夫
家庭款洽泉下閉雙目
爭奈支離甚病裏搥牀斷腸號
哭電光迅轉向慈雲後塵
追逐不盡淒涼感啼曉
霜烏止屋乞

天題特降

紫詔萬口讀

滿江紅

德清徐本立誠庵

天上人閒願長奉
慈姑顏色矢一念生生
死死酸辛無極肯捨
青年夫婿去忍看黃口
孤兒立仗摻摻隻手替
扶持春暉景朝哺乳醍
醐汁宵賭奔清閒習奉
晨昏費盡萬

般心力病枕縈紆烏鳥恨使牀潦倒枯魚泣控青鸞躡景
趁罡風瑤池側

金縷曲

吳縣徐誦芬賦秋

寡鵲彈淒調伴霜帷慈烏返哺白頭人老勉代兒夫供子
職破涕親承色笑辛與苦此心誰曉忍死爲姑姑去矣擁
麻衣血淚啼鴟烏身便向九泉了旌門綽楔摩雲表更
名流歌辭傳誄並摘蘭藻志乘當年曾載筆彤史輝光有
耀重修郡志余分纂列女
當輯入太孺人孝行儂自念北堂萱艸根觸悲酸俄改歲先
慈
於去夏
棄養

香禪精舍集 卷三 詞

淒涼犯

吳縣朱和義子鶴

偷生忍歎傷心事都緣姑命諳屬抱疴盡力茹荼似薺向
隅低哭姑年太促痛含斂何曾俯矚斷迴腸搥牀慟絕隨
侍九泉祝 烏哺情深處涕泣陳情乞頒故志矣
天籙彩雲降也爲人間慰他孤鵠更有名流灑蘭藻辭章
比玉蓼莪篇不忍午夜就火讀

吳烈婦傳

弟潘鍾瑞錄

吳縣吳嘉淦清如

三子父歿

吳烈婦者盱眙教諭吳履齋先生之子婦而茂才師曾之室也姓潘氏幼失怙恃年二十有三歸於吳姑見之喜曰汝以吾甥爲吾媳吾心慰矣無何姑歿烈婦號泣曰今而後誰爲庇蔭我者會茂才亦以毀卒烈婦痛不欲生繼念夫無後而族無可嗣者乃以姪女服斬衰行喪禮遂養爲己女不數年又以痘殤烈婦益孤苦無聊惟寂處一室日事箴紉或焚香誦佛而已庚申夏蘇城寇急城中人率先期徙避烈婦之兄公震曾方任團練事誓不避難眾賴以香禪精舍集

卷四文

一

鎮靜城旣陷烈婦與家人相率赴水死

善不避難及烈

吳子曰庚申歲變起倉猝男女殉難者不可勝數以未得其詳不能爲之紀載心滋戚焉吳烈婦爲潘明經鍾瑞之姊明經記其事甚詳出以示余乞爲傳余惟節烈爲古人所重故得列之史傳所以垂訓後人之意至深切矣若烈婦者豈非史家之所當箸錄者與

仁和朱康壽曼叔

二子官三職

烈婦潘姓長洲人增貢生鍾瑞之姊而同里吳君師曾之室也性柔順識大體生三年父歿九歲遭母喪斂之日循牀慟哭見者咸閔之及嫁事姑如所生其姑嘗謂曰而何

甚似而母也吾得而如見而母矣蓋烈婦母孺人蔣其姑
之同懷姊也以孝婦

旌嗣姑歿吳君以哀毀卒烈婦將殉之顧念夫無子兄弟
行又艱於子不得已乃以從女服斬衰代舉喪禮未幾女
又殤自是長齋繡佛日事文紅足不出戶限庚申蘇城難
作其弟往趨其避之烈婦曰未亡人死分也奚去爲城陷
之前一日家人倉卒出走堅擊烈婦行之范莊范莊者在
蘇州之齊門外翌日賊將及烈婦度不免遂與其妯陶氏
夫兄鍾駱姪慰宗姪婦錢氏五人相率赴水時年三十有
九烈婦生於道光壬午年二十三始嫁嫁六年寡又十一
香禪精舍集 卷四 支 二

年殉節死事間

旌表如制

朱康壽曰庚申杭州之變吾婦汪以烈死當城之未陷也
先有死志焉今觀烈婦語若弟之言何其與吾婦若出一
轍也夫平居譚節義奮然自計一旦臨大變願求言行相
符者乃在一二弱女子也異哉

元和袁學瀾文綺

夫珠沉合浦精衛之寃海難填月墮滄溟女媧之恨天難
補乾坤正氣偏鍾毓於閨幃今古芳型竟卓傳於巾幗蓋
以蓮心木淨塵垢難侵筠節最堅雪霜能拒神劔遭埋而

益顯梅檀因燕而愈馨則有如節烈吳母潘孺人是矣孺人余友潘君麟生姊也幼嫻閩教長習女箴生閩闈之門楣秉荆荇之訓誡梅花骨冷楊容華穎悟通靈瑤艸體清朱妙靜事親承志年二十三于歸同郡庠生吳師曾居安淡泊挽鹿偕臧順協唱隨聽雞戒旦以希範之世家配孝章之名族三朝供膳職任中厨四德宜家禮修內政旣而熊夢無徵鳳雛不育師曾則雲程鷁退書舍鵬臨李廓之蕊榜未登曼卿則蓉城早逝孺人乃愁腸食蓼疾首飛蓬淚灑啼鴉魂驚別鶴六時參梵禪誦皈心十指生皴鍼紉遺日固已素娥憐其勁節青女鑑其幽衷豈意庚申四月

香禪精舍集

卷四文

三

災興粵寇內翼蘇垣百道烽煙機雲映赤千營血雨鱗鬣流紅石唱董逃人思野遁孺人夫兄省之方力董團防志嚴陣守練李瑒之鄉兵扼鮑信之堅壁十二日乃遣眷屬出避祖塋門臨齊女望鄉之魄碎哀蟬地是菴莊好義之田荒鳴蝮惟時邨滿飛鴉路屯封豕萬家飲泣淒切林猿四境哀號流離澤雁翌日城陷省之以巷戰死礮響雷轟刀光雪滾銅溝玉檻成徧地之劫灰文物衣冠蒸滿城之屍氣青憤樊崇之侶入戶縱其猖狂黑山張燕之妖罄室窮其殺掠業已魚游釜底無由雉脫羅中慘值羶羶之肆虐難爲鼠雀之偷生孺人於是舍命輕於鴻毛取義重於

熊掌遂乃從容殉難夏婉常遽赴寒泉慷慨捐軀馮妙眞
自投勺水更有省之妻陶氏夫兄滑川暨其子慰宗媳錢
氏皆以爲破巢中無完卵涸轍下少縱鱗爭憤極而呼天
魂隨胥母俱痛深而蹈壑身媵文魚蓋與孺人俱溺水殉
節焉或者謂被褐微行趙璧容有完歸之日藏蘆隱匿伍
簫豈無喚渡之時則明哲保身艱難出險似可稍忍須臾
徐圖徼倖然而斧螳鋒蝟猝違奇殃靡鳳叱鸞原存定數
與其毒遭豺虎逐風塵而驟馬分香何如清赴汨羅感神
靈而游龍作衛夫荼苦在一時蘭熏傳百世屍香者十日
氣振屬千秋表璇閨之壯志揚彤管之清芬紅蕖不染泥

香禪精舍集

卷四

文

四

汗黃蘖惟知心苦比璠璣之純白作松柏之常青豈不力
荷綱常光爭日月哉且自蘇城遭陷之際時事不可言矣
禮李天桃滿街攀折江梅謝絮入溷飄零邯鄲才人下嫁
廝養河魴宋子同穴輿臺誤易安以駟儉羈蔡女於穹廬
瑤光騰奪堦之嘲彩鳳發隨鴉之歎艸中女子節隳三月
之謠洛下婦人恨受千奴之辱而孺人則甘同晷沒恥作
麕奔避玉質於犬牙葬冰肌於魚腹力窮蒼兕之呼家殉
紅羊之劫沅湘芳芷薰德十年嶧嶺孤桐高標百尺嗟哉
此日輪虧秋兔絲盡春蠶吳市煙消齊宮夢斷悲風起而
鬼母啼潛織停而鮫人泣綠波南浦樹逢春而不花冷雨

西江鶯眠沙而失耦潮回胥口時帶哭聲雲黯蘇臺惟餘
慘色而余獨嘉其蜚英房闈拔萃裙釵秉性玉清練操霜
潔深沉九仞骨肉相依游戲三霄精靈習爽將見

鸞章載錫

鳳綵隆旌齋白題碑石窈封邑晚鶴市雞陂之澆俗垂鶯
閨燕閣之芳徽馨延俎豆諫辭徵希逸之文德備瓊瑁列
傳繼蔚宗之史

香禪精舍集

卷四

五

蘇軾案之史

開佛閣之芳徽轉運於豆蔻朝燿奇感之文德備瓊瑁列
傳繼蔚宗之史

鸞章載錫

鳳綵隆旌齋白題碑石窈封邑晚鶴市雞陂之澆俗垂鶯
閨燕閣之芳徽馨延俎豆諫辭徵希逸之文德備瓊瑁列
傳繼蔚宗之史

書吳烈婦傳後

吳縣元樹滋鐵卿

余既書潘孝婦傳後麟生又以所撰吳烈婦事略徵題余讀之而喟然歎曰嗟乎天之阨列婦何其甚歟烈婦姓潘氏麟生之姊幼失怙恃年二十三歸於吳越六年夫卒烈婦痛不欲生茹荼食苦者十一年庚申之難赴水死蓋節而繼以烈者也自宋儒有餓死事小失節事大之語後世化之婦人之從一而終者視爲恆事況烈婦幼稟母訓熟聞詩禮之教其矢志也固宜迨寇難急麟生往探烈婦曰未亡人生死早置度外然後知烈婦之志蓋素定於平時香禪精舍集

卷四

六

而非世之倉卒引決者所可侔矣非具過人之識安於義命而惡能斷然蹈之也哉抑余尤有感焉今夫閭巷匹婦享父母室家子孫之樂者天固未嘗靳也而獨靳於烈婦豈非命之自天而烈婦有不能自主歟然而蘇城之陷天初未嘗責烈婦以必死也而卒能從容畢命不欺其志是則烈婦所自爲政而亦豈天之所以能主歟余故樂得而書之以見天亦有時聽命於人焉

長洲蔣德澂程薌

余觀列女傳所載或以孝著或以節著或以烈著莫不出於至性至情而各成其一是一然未有如潘孺人之兼此三

者九爲巾幗完人也孺人爲余外女弟又爲妻弟婦父蓮峰公母旌孝婦幼失怙恃養於伯母長適吳君師曾姑卽其從母也姑愛之如女姑歿則號泣曰今而後更無庇蔭我者矣其平時之孝姑可知年二十九而寡無子可嗣僅以姪女舉喪禮未幾天殤形影相弔者十餘年其苦節又可知庚申之亂或勸之他徙則曰未亡人違計生歿耶城陷後合家殉難於婁門外范莊祖塋者五人而孺人與焉其烈爲何如嗚呼孺人之孤苦迤邐一生遭遇何至於斯乃其秉乎至性以完懿行轉若因難而見異者夫孝也節也烈也爲女子者之美名也或求之而不得或得之而不

香禪精舍集

卷四

七

備惟孺人以一身全之是天阨其遇天不能阨其名也今磨生外弟述其事略示余乞表彰之爰書數語以志欽抱而不暇惡其詞之不文

其從母也姑愛之如女姑歿則號泣曰今而後更無庇蔭我者矣其平時之孝姑可知年二十九而寡無子可嗣僅以姪女舉喪禮未幾天殤形影相弔者十餘年其苦節又可知庚申之亂或勸之他徙則曰未亡人違計生歿耶城陷後合家殉難於婁門外范莊祖塋者五人而孺人與焉其烈爲何如嗚呼孺人之孤苦迤邐一生遭遇何至於斯乃其秉乎至性以完懿行轉若因難而見異者夫孝也節也烈也爲女子者之美名也或求之而不得或得之而不

潘孝婦吳烈婦傳後跋

嘉興楊象濟利叔

吳長洲潘麟生明經手其母蔣孺人孝婦傳述並其女兒殉難事略徵文以埒家乘孺人夫故守節撫諸孤成立格於年例而獨以孝行被

旌歿三十年而女子適吳氏者於咸豐庚申夏城陷畢命其寡也亦十一年矣潘氏於象濟爲姻戚而吳越接壤同時陷賊我族男女遇變捐軀者象濟皆呈報大部

恩子衮卹方築祠於里中明倫庵勒碑記載獨先大母節孝事跡常刻有詩文銘志哀詠等作彙爲五卷中亦有明

香禪精舍集

卷

□

經詩在乃粹毀於兵燹僅存目錄於新刊支譜今茲明經表揚母德時際

中興無虞廢棄他日志乘采錄足以慰孝子之思而徵潘氏之閨教矣夫家庭恒願百年無事而義理不可一日不明凡百士女其敬聽之哉

吳長洲潘麟生

吳長洲潘麟生明經手其母蔣孺人孝婦傳述並其女兒殉難事略徵文以埒家乘孺人夫故守節撫諸孤成立格於年例而獨以孝行被旌歿三十年而女子適吳氏者於咸豐庚申夏城陷畢命其寡也亦十一年矣潘氏於象濟爲姻戚而吳越接壤同時陷賊我族男女遇變捐軀者象濟皆呈報大部恩子衮卹方築祠於里中明倫庵勒碑記載獨先大母節孝事跡常刻有詩文銘志哀詠等作彙爲五卷中亦有明香禪精舍集卷

嘉興楊象濟利叔

潘孝婦吳烈婦傳後跋

吳烈婦詩

弟潘鍾瑞錄

元和袁學瀾春巢

正氣偏鍾巾幗賢
全身白璧奮沉淵
滄桑變起昆明劫
節烈心清古井泉
六月霜應飛積地
九蓮佛定接昇天
七姬廟外淒涼月
留照芳型萬古傳

名門節孝本家傳
母訓親承自昔年

烈婦母氏蔣以孝婦得旌

玉質輕捐

離虎口烈香寒沁入龍涎
恨天國破媧難補
寃海身沉鳥莫填
應與水仙同配饗
縹衣羽蓋月中還

吳縣吳重熙蓮琴

中年寡鵠劇傷心
況值流離淚不禁
齊女門邊一憑弔
招

香禪精舍集

卷四詩

魂應賦女嬃砧

全家殉節闔閭城

謂省之渭川昆仲

彤管芳貽後世名
他日輶軒徵

太史延陵中幃表雙清

先室朱孺人亦殉難

吳縣吳恩熙菡萏

懿女士兮節堅貞
如玉斯潔兮如冰清
十年不雙兮侔陶嬰
忽蘇臺兮烽火驚
徧郊野兮麋鹿縱
橫證白水兮願同盟
齊女門邊兮咽波聲
招絳節兮歸玉京
成仁取義兮全令名
愧食祿兮徒偷生

青浦金

熙二溪

雪虐風饕閱歷來
天教傾覆作栽培
兒夫似續成三絕
怙

侍尊章併七哀中慟可傳多薄命史臣難得紀全才竹生
有節松生烈本性還從寸艸莖

青浦金 玉曼鴻

亮蒼蒼者崇懿懃兮迺有時而莫可憑嗟夢夢者靳福澤
兮又畢力而畀以名冰霜雷電迭降兮皆天之所爲玉成
振古而盡如是兮甯獨榮陽女之歸於延陵烈婦捐軀自
千古兮述之者猶流涕生平爲女莫慰其孝兮怙恃失於
髫齡爲婦不幸以節見兮姑死而夫又戕其生爲母且無
所用慈兮哭愛女而僅屬螟蛉人未亡而心先灰兮矧禍
又遭於吳城延陵一門皆殉義兮尤難者節與烈并婦今
香禪精舍集 卷四 詩 二

上元凌志珪桐叔

吾友潘騎省摘藻冠詞場爲述女須事擇精語且詳滴淚
迸血作至性發文章把卷未卒讀三歎起傍徨德門生淑
媛困阨乃備嘗三歲卽失怙靈椿隕秋霜九歲諉艸萎孤
露九可傷幸承伯母歡鞠育同高堂廿三歸吳氏諸母爲
姑婢力作操并曰巧手製衣裳辛勤盡婦職戚鄙咸稱良
大婿富才華蚤歲列膠庠佳耦相倡和樂事在閨房胡爲

姑不壽擗踊裂中腸郎君乃純孝哀毀終親喪天心何太
忍分散鴛與鴛姑歿無庇蔭夫歿孰主張膝下苦無兒撫
女倚繡牀寄生艸不活珠碎旋又殤煢煢獨弔影身世歎
茫茫長齋惟繡佛青燈燄少芒一朝潰兵圍縱火掠金閭
居民盡奔竄遑問人未亡捐軀志已決矢歿投芳塘全家
甘赴難藁葬向何方骨肉生多故尸骸灰莫藏終身遭慘
變幾欲問波蒼抑知歷劫盡後世傳芬芳

九重旌節烈俎豆奉馨香千秋萬歲名永爲家國光愧我
乏文采不足語表揚斯世婦若女效法幸勿忘

元和葉廷瑄調生

香禪精舍集卷四詩

三

天意成奇節艱難自早年悲哀方備歷離亂更相連至性
慈徽續母爲節孝
蔣孺人芳名浩劫傳蘇臺盛篋絃止水有誰先

吳縣貝信三潤孫

母以孝傳女殉烈一歿完貞志何決范家莊前水一泓風
起不波慘流血烈婦矢節踰十年年二十九隕所天遺雛
不育姑繼逝此身蚤誓隨黃泉婦不遇賊心久歿肯使兇
鋒逼女子同日捐軀有六人闔門大義輝青史嗚呼烈婦
之烈非殉名堂堂巾幗羞簪纓艸間偷活真虛生

長洲潘雷雨田

人世有苑枯遭逢每不偶一枝弱棟華卓爲節烈婦憶昔

年少時北堂依慈母婉婉善從人天性最純厚于歸侍衰
姑時洗羹湯手夫婿不凡才文壇推祭酒琴瑟協和聲同
心如賓友方冀奮青雲象服鏘瓊玖胡天降鞠凶莫假顏
子壽二豎迭爲災姑先而婿後女姪作孤兒曇花又難久
熒熒形影單年纔二十九繡佛持長齋淒其自消受嗟哉
厄運來蜂起黃巾陡閭里唱董逃省垣恣躡踪路歧羊悔
亡險迫鹿挺走骨肉嗟流離書絕魚腹剖齊赴范莊水全
家生不苟甯知滅頂凶惟矢潔身守余本兄妹行往事漫
回首竊歎婦道難儉勤操井臼一旦罹兵戈大義誰無負
吾妹何凜然鬚眉亦罕有水淨能滌塵心清肯蒙垢踴躍
付長流悠悠脫虎口

香禪精舍集

卷四

詩

四

旌表勒貞珉千秋永不朽

吳縣汪玉齡校生

芙蓉泣露鴛鴦死井底波瀾誓不起倉皇麋鹿游蘇臺無
瑕白璧沈清水范莊澗溪慘不春吳氏捐軀共六人節烈
兩全兼一身視死如歸鴻毛輕孝義傳家信有真

旌表萬古留芳名

吳縣雷

浚甘杞

潘君語我吳烈婦索我爲作烈婦詩烈婦何人君之姊庚
申四月寇至時婦已無夫下無兒夫兄震曾家主持有家

侃侃誓不移況督團練職有司城亡與亡夙所期城破震
曾巷戰灰望齊門外家有祠先灰一日驅婦子烈婦與焉
纍纍隨婦乃至祠沉於水早灰免辱何遲疑清澈一泓天
在底此身付白水此心青天知烈婦少小失怙恃廿三有
家乃于歸夫曰師曾名秀才廿九稱未亡卅九殉烈烈名
垂同灰二人陶與錢是爲震曾婦與姪慰宗妻史法牽連
例得書惟婦節烈雙崔巍

錢塘王彥起研香

母以孝傳女灰烈德門勁節竝森森灰飛竟墮紅羊劫月
缺常盟白水心定有遺徽傳史筆可堪悽咽斷髮砧闔閭

香禪精舍集

卷四

詩
五

城下波如練猶照冰魂獨夜臨

秀水孫灝次公

十年彈寡鵠縲斷不成音一再明珠碎倉皇白璧沉風清
古井水月冷女髮砧殉難全家後碑銘孰與任

歸安管蘭滋谷香

幼稟已殊俗能承母教賢懷芳比蘭茝履潔赴淵泉志決
滄桑始名標節孝先因之憐我女同抱恨繇繇

余次女適吳縣
呂氏庚申四月

摺被擄即
日投水死

元和陸懋修九芝

十年莖鬢鏡光寒誰恤痿痺感百端得侍君姑如母在強

將女姪當兒看奔騰逆餒餘生促履蹈清流大節完那怪
海濱聞弱弟濡毫紀載淚難乾

長洲葉昌熾鞠裳

母能全孝女全貞含笑相從下九京千載魂埋魚腹冷一
家危其燕巢傾人真薄命同高懸弟幸能文似屈平不媿
女嬃遺烈在范家莊外暮濤聲

吳縣楊引傳薪圃

幼遭孤露長棲居猶復捐生劫火餘有弟能傳真節烈無
兒難振舊門閭玉成苦志嗟何酷珠隕清流索亦虛秋水
又平齊女墓貞魂空化白芙蕖

香禪精舍集

卷四 詩

六

震澤王廷鼎夢薇

吁嗟榮陽女節烈兩無負昊天胡不弔孤苦一身受襁褓
父見背九齡復喪母母氏樂安族孝行傳鄰右女性夙幽
嫺稟自母德厚及笄教于宮嬪作延陵婦宜家纔幾年大
故迫前後愛憐失吾姑燕婉喪吾耦如痛不欲生殘喘延
亦苟遺息又奪之焚焚清閨守顛連一至斯苦節自貞久
莽莽黃巾來入市虎狼吼惡氛不可撓倉卒草間走婦生
矢以貞婦歿肯蒙垢湯湯叟江水清淨心無忤苦志賚以
終掩沒伊誰咎招魂賴介弟幽光發瑤玖吾讀列女傳茲
誼古鮮有表德愧無才敬讓名公手

來安孫 點頑石

天蒼蒼兮水茫茫前因今果難參詳世間凡事皆無常惟
有節烈永流芳烈婦世居蘇臺鄉德門潘氏有令望其母
守節殉姑孀幼失怙恃早斷腸伯母撫之猶子行廿三歸
吳催新粧諳姑食性調羹湯翩翩夫婿紫薇郎相期異日
超龍驤深閨靜好樂未央佳兒佳婦娛高堂不圖姑病沉
膏肓藁砧哭母相繼亡罡風吹散雙鴛鴦仰天號泣感道
旁顧無子嗣誰舉喪姪媛承祧禮相當曾不數年又痘瘍
熒熒血淚空傍徨自是幻夢醒黃梁茹荼奉佛燃明香焉
然浩劫遭紅羊萬家遷徙紛遠颺烈婦曰嘻何俯張生生
香禪精舍集 卷四 詩 七

灰灰憑穹蒼度不能免歸范莊范莊有水波汪汪拚身一
擲同沉湘女伴見之爭慨慷四人相率入滄浪從容完節
心徜徉節且烈兮名煌煌大吏入告來

龍章有弟手足情難忘署其行誼輝幽光徧徵詞翰昭千

霜令我讀之心感傷憶昔庚申寇披猖余家有姊罹其殃

自知弱息難自強一朝就義甘胥戕洪澤湖邊流水長同

時姊妹葬送場庚申賊擾敝里余三姊四姊
年甫及笄同赴洪澤湖死我欲作傳願未償得

讀鴻製增慙惶謹賦長歌效柏梁愧無椽筆爲表彰

江甯司馬湘晴江

淑德相承母教敦安仁家世本名門行高粱媛徽音播義

守陶嬰壺範尊十丈清淵沉弱骨千秋流水咽貞魂固應
節烈榮

旌表綽楔輝煌荷

聖恩

太倉畢蔭笏搢卿

東吳潘烈婦名與金石爭母教稟弱歲婦道終有成姑也
亦我母吁嗟歸瑤京況復鸞鏡破所天忽焉傾風鶴從西
來萬戶心魂驚閨門自鎮定烽火方縱橫勢逼情彌蹙節
重命乃輕嶙嶙橫山石不足比其貞洋洋具區水不足比
其清大吏謹入告綽楔邀

香禪精舍集

卷四 詩

八

恩旌流芳億萬年彤史有定評

吳縣曹毓英子千

母教童年懷堅心守此身臨危拚死賊全節未亡人鵲血
團貞魄鶯花慘暮春女嬃今不見同病感靈均

吳縣汪麟昌子彥

身世蒼涼感喟多窮途况復值干戈至今齊女門前水中
有貞魂誓不波

錢塘朱 本肖沆

母教閨門孰繁林痛所天麻衣悲雪積筠節勵冰堅燧火
連三月全家聚九泉清漣河畔水遺烈已千年

歸延陵先姊事略

先考蓮峯府君生三男一女余最幼姊長余一歲以道光二年壬午四月四日生時仲兄已殤先妣蔣太孺人始得女絕愛憐之甲申正月府君棄養太孺人念子女幼不忍以身殉辛勤鞠育逾六年庚寅春遭大母繆太宜人之變罹病哀毀旋亦棄養姊方九歲扶牀嗚咽見者憫之三伯父廣文公撫余兄弟二人而姊爲大伯母顧太宜人撫養伯母無女視如己出姊性柔順奉命謹恪至於成人廣文公在廣德任送試金陵晤盱眙教諭吳履齋姨丈爰爲表弟師曾與姊締姻焉甲辰姊年二十有三歸于吳時姨母在堂姊私念姑與我母一脈見姑如見母姨母亦善之曰汝以吾甥而爲吾媳而善事吾吾滋慰矣旣又曰觀汝舉止甚似汝母吾憐汝益念汝母耳越明年姊夫以縣試第一入邑庠戚黨長者目爲大器且爲吾姊徵福澤焉戊申產一女不育己酉冬姨母咳嗽舊疾久發不瘥姊竭誠侍奉竟不起呼天號泣曰今而後更無庇蔭我者矣會姊夫亦病哀瘠過節百餘日終以毀卒姊連遭大故痛不欲生顧念夫無後兄弟行皆艱於丁無可嗣者乃以姪女服斬衰舉喪禮遂養爲己子女無母亦暱就姊不數年又以痘殤自是姊益孤苦寂處一室日事箴紉時或焚香誦佛而

已庚申蘇垣之變城中多先期徙姊之兄公省之表兄方董團練事任事久誓不避家中人因之以靜鎮城既陷不復得消息每遇故鄉之稔吳氏者訪問之輒傳惡耗疑且駭莫能信近有人與吳有聯親探於范莊始悉其實范莊者蘇城齊門外吳氏祖塋在焉蓋吳家諸人於四月十二日倉卒至彼而省之仍畱家中翌日城破未幾擾及附郭度不免遂相率赴水是爲表嫂陶氏渭川表兄暨子慰宗媳婦錢氏并我姊五人而省之在城以巷戰亡噫閤家殉難死矣傷哉憶余於十一日造其家省之猶指揮公事座客有勸移眷者置不顧入見姊姊曰未亡人生死早置度

香禪精舍集

卷四

略

二

外余歎惋而出詎意從此不復見耶余幼體弱太孺人愛余甚衣食調護往往急余而緩姊姊稍長提攜引掖余尤賴姊力焉家居同堂姊妹六人既嫁妯娌五人姊一處以和他如睦嫻姪孚臧獲人言翕然其純厚如是而遽至於此耶竊維姊幼失怙恃依於伯母伯母死依於長嫂嫁後庶得所依而姑歿夫亡形影相弔至僅嗣一女猶不得長畱膝下天之厄於姊者亦已酷矣又使之遭亂不獲令終蒼蒼者天恨不能呼而問之也余既臚列吳氏閤家殉難

事呈報請

卹又念吾姊夫亡守節之歲年二十有九迄庚申已逾十

年於例得以節

旌是吾姊之節且烈昭昭不朽意者天欲彰其名而俾之
死以成之耶嗚呼痛哉喪亂未平骨肉離散長兄江畔弱
弟海濱收骨故鄉未卜何日臨風一慟魂今何依灑淚濡
墨狗述厓略伏冀當代立言君子作為傳誄歌詠以彰幽
行實為厚幸焉咸豐十一年辛酉長至弟潘鍾瑞謔於滬
瀆寓齋

香禪精舍集

卷四

略

三

